

宋

會

要

宋會要

殿中省

監少監監丞各一人監掌供奉天子玉食醫藥服御噲
帝輿輦舍次之政令少監為之貳丞參領之凡總六局
曰尚食掌膳羞之事曰尚藥掌和劑診候之事曰尚醞
掌酒醴之事曰尚衣掌衣服冠冕之事曰尚舍掌掌次
舍幄帝之事曰尚輦掌輿輦之事六尚各有典御二人
奉御六人或有典御二人
門二人或一人又尚食有膳工尚藥有醫師尚醞有酒
工尚衣有衣徒尚舍有幕士尚輦有正供等司分隸其
局又置提舉六尚局及管幹官一員舊殿中省判省事
一人以無職事朝官充雖有六尚局名別而事存凡官
隨局而移不領于本省所掌唯郊祀元日冬至天子御
殿及禘祫后廟神主赴太廟供其織扇而殿中監視秘

書監為寄祿官而已元豐中神宗欲復建此官而度禁中未有其地但詔御輦院不隸省寺令專達焉初權太府卿林顔因按內藏庫見乘輿服御雜貯百物中乃乞復殿省六尚以嚴奉至尊於是徽宗乃出先朝所度殿中省圖命三省行之而其法皆左正言姚祐所裁定是歲崇寧二年也三年蔡京上修成殿中省六尚局供奉庫務勅令格式并看詳凡六十卷仍冠以崇寧為政和元年殿中省高伸上編定六尚供奉式靖康元年詔六尚局並依祖宗法又詔六尚局既罷格內歲貢品物萬數尚為民害非祖宗舊制其並除之御藥院勾當官無常員以入內內侍充掌按驗秘方以時劑和藥品以

進御及供奉禁中之用舊制勾當御藥院遺官至遙領
澤浸不可止嘉祐五年詔御藥院內臣如當轉出而特
留者候其出計所留歲月優運之更不許
序非勾當御藥院典八人藥童十一人
留者其出更不推恩
尚衣庫使副使舊曰內衣庫大中祥符二年改監官二
人以內侍三班充掌駕頭服御織扇之名物凡御殿大
禮前一日請乘輿衣冕鎮圭袍服於禁中以待進御事
已復還內庫典一人匠四人掌庫十人內衣物庫在文德殿
後太平興國二年置受納匠段庫受納綾錦監官二人
西川鹿胎綾羅絹匹段大中祥符元年併入
以京朝官并內侍充舊及三人以諸司使掌受納錦綺羅
綾色帛銀器腰束帶料造年支準備衣服以待班賜諸
王宗室文武近臣禁軍將校時服并給宰臣親王皇親

使相生日器弊兩府臣僚百官皇親轉官中謝朝辭特
賜及大遼諸外國人使辭見銀器射弓衣帶典八人掌
庫三十一人 新衣庫在太監官二人以諸司使副三
班及內侍充掌受錦綺雜帛衣服之物以備給賜及邦
國儀注之用併受納衣服以賜諸司丁匠諸軍監門二
人以三班使臣充典十人掌庫五十五人朝服法物庫
太平興國二年置後分三庫一在天安殿監官二人以
後一在右掖門內北廊一在正陽門外
諸司使副及三班內侍充掌百官朝服諸司儀仗之名
物典三人掌庫三十人已上崇寧二年併入殿中省有舊
裁造院針線院雜
賣場後省併入兩朝國史志殿中省判省事一人
以無職事朝官充舊有六尚之局名別而事存今尚食

歸御厨尚藥歸醫官院尚衣歸尚衣庫尚舍歸儀鸞司
尚乘歸驂驥院內安鞍轡庫尚輦歸輦院其官隨局而
移皆不令於本省省司所掌惟郊祀元日冬至天子御
殿及禘祫后廟神主赴太廟繳扇而已書令史三人都
知二人 太宗太平興國六年五月詔殿中省細仗着
黃人自今令着碧 端拱元年詔殿中省書令史舊七
人自今減為三人 淳化三年二月詔殿中省押當儀
注官今後遇入閣如闕官令御史臺於見任朝官內牒
差攝訖奏至道元年三月詔殿中省於御街東面庫屋
內以三間為庫貯法物一間為省局一間為吏舍本省
職掌番宿看守 真宗大中祥符元年八月詔步軍司

差官剩員二人於殿中省巡宿看管法物庫

以上國朝會要

神宗熙寧四年十二月十四日詔殿中省所管儀仗法物撥與太僕寺管係正名丞闕職掌隨所主事件赴本處指教同共祇應其見在役及三年已上人且依舊試補選限出官差有職事臣僚兼判向去更不補入元豐五年五月十一日詔殿中省於三省用中狀尚書六曹用牒不隸御史臺六察如有違慢委事言御史彈奏六月二十七日詳定官制所言御輦院乞依舊隸太僕寺其輿輦及應供奉事隸殿中省從之惟御輦院不隸省寺七月二十四日詔御輦院既未有所隸宜令專達時上欲釐正殿中省職事置六尚如唐故事度禁中地

未有置省之所故有是詔八月四日詔殿中省聽御史
長官若言事御史彈糾先是監察御史分六案隨所隸
察省曹寺監而三省至內侍省無所隸故以長官言事
御史察之 哲宗元符元年十一月二日詔御輦院官
係進乘輿最為親近今梁吉者出自軍伍似非所宜可
令吏部審會別選行差自今關官准此 徽宗崇寧二
年二月十二日中書省修立到殿中監尚食尚藥尚醢
尚衣尚舍尚輦官制等下項殿中監掌供奉天子玉食
醫藥服御幄帟輦輿舍次之政令總六尚局而修其職
監一人少監一人丞一人簿一人令史二人書令史六
人貼書十二人尚食局掌供御膳羞品嘗之事典御二

人奉御六人監門二人膳工二百人膳徒三十人食醫
四人司珍六十人掌庫二人雜役三十人庫典十二人
典事二人局史六人書吏七人以御厨翰林司凡供御
事悉釐入尚食局以直下事釐為太官令主之太官令
增一人通舊監御厨官為四人以今御厨內臣武官監
官四人釐為奉御增置二人通為六人增監門二人唐
有食醫以辨飲食禁忌今置四人以供御工匠百八十
人并却虞候已下餘令本分擘大官外擇精熟人入
尚食局通為膳工共置二百人託盤院子以三十人為
膳徒以專知為掌庫以庫子為庫典以押司官為典事
以分手為局史以書手為書史並量定人數餘人太官

內翰林司供御人員等並為司珍於局內別置一處本局官通管尚藥局掌供奉御藥和劑診候之事典御二人奉御四人監門二人醫師二人御醫四人醫正四人醫佐四人藥童二十人封人三人藥工十人掌庫二人庫典七人局長一人典事二人局史四人直史四人書吏三人貼書十人今以御藥院凡供御湯藥之事釐為尚藥局餘事分釐入他局外御藥院舊無監官今供藥餌事體為重增置內臣監官四員為奉御以醫官使上名有功效者為醫師醫官使為御藥副使為醫正醫官為醫佐雜役秤子搗碾之類為藥工檢點文字為局長押司官為典事前行為局史後行為直史帖司為書吏守關

貼司為貼書封角人為封人尚醞局掌供奉酒醴之事
典御二人奉御四人監門二人酒人十五人酒工五十
人掌庫二人庫典五人局史三人書吏二人應法酒庫
供御事並釐為尚醞局增置監官內臣四員為奉御以
供御庫酒匠為酒人炊淘之類為酒工餘依諸司名外
應法酒庫非供御事並依舊監官亦合依舊炊匠十人
今增五人共為酒人長行斛子三十九人今增十一人
為酒工尚衣局掌供御衣服冠冕之事典御二人奉御
四人監門二人掌庫二人衣徒三十人典事二人局史
五人書吏二人貼書五人庫典十人縫人十二人典功
二十人染人七人以今尚衣庫所主事分釐為尚衣局

除扇簋釐入尚輦袞冕法服合降付本局置庫收掌并
御藥供應御衣帽子幞頭等釐入局外置監官內臣或
武臣為奉御通作四員押司官為典事手分為局史舊
御藥院有貼司今隨事釐二名入局為書吏守闕釐入
五人為貼書本庫舊有裁縫匠二人通御藥院今增十
二人為縫人舊庫有供御裹三人及御藥院有裹幞頭
帽子五人造靴作一名腰帶作二人靴履作屨作各一
人今通作二十人為典功舊染御服一人切慮太少今
通作七人為染人專副共為掌庫庫子共為庫典尚衣
無雜役使今定為二十人為衣徒尚舍局掌供御帷帟
張設之事典御二人奉御四人監門二人幕士一百人

正供五十人次供五十人掌庫十人庫典六人局史二人書吏二人以儀鸞司應供御事并入尚舍局增置監官內臣四員為奉御其餘應供諸處並各依舊為儀鸞司見今監官並依舊所有本局工匠人今量定人數恐未均足今本局官更分合用人立為立額以舊供御人為幕士以次供御為正供以搭材為次供尚輦局掌供御輦事典御二人奉御四人監官一人正供二百二十人次供一百三十人下都一千人知庫二人典庫一十人典事一人局史二人書吏三人以御輦院事釐為尚輦局增置內臣監官四員為奉御仍以尚衣庫扇篋釐入其正供御次供御下都三色人舊亦祇應殿閣使用

今雖約定人數恐未均足合本局將應供御人分定釐
入本局外將餘人併入車輅院今後應付批降取索及合
供應諸處並增減量定人數令車輅院充應外舊御輦
院吏人數少今特添三人一人職級充典事二人貼司
充書吏釐舊來二人額為局史其知糧司更不專置只
於分手或貼司內差充其六局別更有釐正事在他局
內如乳酪院之類候於寺監取索到續行釐入殿中監
今擬定在列曹侍郎之上少監序位欲在秘書監之下
丞欲在諸寺丞之上提舉六尚局欲在副都知之下閣
門使之上六尚管勾欲在樞密院丞旨之上押班之下
六尚典御欲在樞密副丞旨之上詔六尚局各添置管

勾一員內典御已增置一員外共置提舉六尚局一員以入內省官充雜壓殿中監在正議大夫之下提舉六尚在延福宮使之上餘依擬定十四日殿中省言本省掌供奉天子玉食醫藥服御幄帟輦輿舍次之政令總六尚局而修其職置令史二人書令史六人貼司十二人切緣專掌供進之事所繫甚重與他司事體不同今建局之初全藉諳練行遣謹畏之人須合於寺監內外官司選擇抽取即作以曾有抽取之人若不割隸名籍不得專一祇應今乞特許不依常制指名抽取如礙本處前後一切條禁彈奏科罪更不發遣指揮並乞依今來指揮仍割隸各籍從之同日殿中監言本監今來行

移文字乞依祕書省例以殿中省為名從之五月六日
詔殿中省官並赴內朝立班九日詔御藥院可候省中
省六尚建局日除供御湯藥事釐歸尚藥局又供應御
衣等釐歸尚衣局外其崇恩宮等處供應及排辦香表
國信禮物御試舉人臣僚夏藥并自來應干事務等並
依舊主行仍改名內藥局其見勾當官已係六尚職事
者令兼勾當依舊禁中供職今後新差到官準此同日
詔殿中省食直錢內尚輦局典御奉御仍破第三等御
厨食餘依舊提舉四十貫管勾三十五貫典御三十貫
奉御二十貫十一日詔差兩制二員選試尚藥局醫官
並依試診御脉醫官條例施行十四日詔已置尚食局

其御厨翰林司併入太官局太官令五員見勾當御厨
官夏倜王遵張大忠並改充勾當太官局黃滂改充太
官令其見今光祿寺太官令亦依此改入本局惟掌祠
事翰林司供御事已併入尚食局餘事合存留翰林司
并見任官依舊已置尚衣局合併尚衣庫入祇候庫見
任官併入祇候庫已置尚輦局御輦院供御事已併入
尚輦局餘事併入車輅院除已差充六尚局官外御輦
院改為中書院更不併入車輅院監官改為勾當中車
院二十一日詔應殿中省官並赴內朝閣門擬定在工
部侍郎西別班立少監以下各重行二十三日詔殿中
省監治一省之事凡事干他司若奏中牒帖皆專總之

少監為之貳提舉官總六尚之事凡事不干外司若承
宣旨供奉應辦及事係宮禁皆專總之與少監不相統
屬監少與提舉官行移以牒管勾典御皆具狀申省二
十六日殿中省言今月二十八日太后受冊并六月五
日皇后受冊所有本省合點檢儀仗排立次第緣今來
未有立定官吏入殿點檢條貫欲乞特降指揮許本省
官將帶人吏三人於習儀日并至日入殿點檢施行從
之 三年二月二十九日蔡京言奉詔令講儀司修立
六尚局條約聞奏謹以元陳請畫一事件并稽考參酌
創為約束刪潤修立成殿中省提舉所六尚局供奉庫
敕令格式并看詳共六十卷內不可著為永法者存為

申明事干兩局以上者總為殿中省通用仍冠以崇寧
為名所有應干條畫起請續降申明及合用舊司條法
已係新書編載者更不行用不係新書收載各令依舊
引用從之五年正月十六日詔六尚局供奉庫物見拋
降諸州軍歲貢已起發在路者即令赴京送納餘並停
貢大觀三年十一月一日中書省樞密院同詔下項一
應緣御馬事依大輦例隸尚輦局仍差前班大使臣二
員充奉御前有人吏并騎御馬直教駿人兵更不添置
餘並如舊制一御馬隸殿中省尚輦局凡大禮朝會車
駕行幸供進并入殿排立引從之類典奉御主之具調
養賞罰事依舊左右驂驥院官管勾一典御令尚輦典

御兼領奉御令中書省取旨差一奉御宿值依本局見
行條法一行遣事務令本局人吏兼管一每季令殿中
省官依條檢察一未盡事件令殿中省條畫聞奏奉御
筆關送中書省詔差任渥黃訐十二月二十六日提舉
六尚局所言朝廷肇建殿中省六尚局自崇寧三年至
今已及五年官各安職應奉有緒伏覩殿中省於大觀
二年八月內因殿中監宋昇檢舉奏請就本省監少丞
簿廳安置題名記畢工誠為儒者之幸況本省官自提
舉管勾典奉御至監門悉自上選非材幹詳敏之人必
不得預臣雖不才濫叨器使即未曾陳乞刻石以記姓
名置於治所室壁似乎闕典未稱朝廷設官創局之意

欲乞許令安立所有差取人物并管勾官吏等並乞從
本所依昨安置殿中書題名記逐次所得朝旨施行詔
依差姚祐撰文李時雍書 政和元年十一月十七日
殿中監高伸等言准詔編定六尚供奉式今已成書詔
殿中監少丞簿劉瑗等各與轉一官內劉瑗依條回授
手分書寫人共一十一人內使臣三人各轉一官餘八
人候有名目轉一資餘等第支賜二年十二月二十八
日殿中省奏檢會通用令諸受殿中省若六局所會事
急速者即日回報契勘供奉庫取會文字亦于供奉未
曾立定日限欲乞今後應官司承省局若供奉庫取會
事急速者限即日餘限三日回報有緣故不得過十日

如有稽遲其合干人從本省牒大理寺究治施行從之
三年正月二十五日詔殿中省尚食局收使臣王淑等
欠家事備償價錢在京使臣令諸司糧料院等處在外
使臣令本路所屬官司請受內一面依條剋納入官今
後准此六月八日殿中省言供奉庫係專一受貯諸州
歲貢六尚供奉之物多是貢發違期兼到闕其間有不
堪或短少之數不免移文催促補貢蓋緣自來移文止
作常程轉遞致有留滯即未有立定約束今相度欲乞
今後應省局并供奉庫下諸路催促貢物並入馬遞其
承受州並限三日回報施行如涉稽違從本省牒逐路
監司究治施行庶幾歲貢之物易為辦集不致闕悞從

之五年六月二十九日試殿中監詳定六尚供奉勅令
兼詳定一司勅令高伸等言昨奉朝旨以尚食局食醫
纂要淆雜不可奉行令將食飲禁忌及不可同食者編
修為食禁經尋以諸家醫經討論參酌創行詳定修成
食禁經一部計三卷對修尚食局等處禁約一卷冠以
政和為名謹隨表進呈如得允當乞下本所鏤板頒降
從之八年三月十六日殿中省言奉詔取責供具諸路
歲貢六尚供奉物內除年計合用數外並令裁減施行
本省恭依御筆供具到年計合用物數其貢發限約束
等乞依見歲貢法施行所有其餘貢物並合裁減乞下
本省鏤板遍牒頒降施行詔依有司輒敢陳請復貢以

違御筆論 宣和二年五月十日殿中省言據供奉庫
狀勘會泛買六尚所須之物專係供使用與歲貢物色
事體頗同所有用袋入匣封記選擇及違限退送稽程
等並乞比附歲貢條例施行從之 欽宗靖康元年正
月四日詔六尚局並依祖宗法八月十九日詔六尚局
既罷其格內歲貢品物萬數極多尚為民害非祖宗舊
法可並除之

御藥院在崇政殿後至道三年置大中祥符八年移於崇政殿門外東華門南寶元二年九月復移於殿後東廡皆按局秘方合和御藥專奉禁中之用及別供御膳若御試舉人別長領示考官寄條貫監彌政之事初以入內內侍三人勾當政參用士人天聖中又置工御藥及上御藥供奉多至九人後皆罷之今止以入內供奉四人通領有藥童十二人兩朝國史志御藥院勾當官無常員以入內內侍充掌按驗秘方以時劑和藥品以進御及供奉禁中之用勾當御藥院遣官至選領園祿防禦者謂之閣轉干冒恩澤寔不可止嘉祐五年詔御藥院內臣如當轉出而特留者俟其出計所留歲月優遽之更不許累寄所遣資序非勾當御藥院而留者其出更不推恩典八人藥童十一人匠七人舊置幹辦官四員以入內內侍充今置同舊置典事二人局吏二人書史四人貼書七人守闕貼書不限人數今置同惟是守闕貼書一十五人分掌職事生熟藥案日常承準應

奉御前取索湯藥排辦賜臣僚夏臘藥供奉宣賜宮禁生日節序物色等雜事崇掌行差取排辦御試舉人殿內應干一行合用人物等并郊祀大禮使人到闕筵宴取會諸處合用禮儀節次等書寫御覽修寫排辦

崇奉祖宗香表爵僧設浴香經製造供進御服御服腰束帶等并日常應

奉本院常程諸事務開拆司承受諸處投下應干文字付合行果分

行移發放仁宗天聖四年詔上御藥供奉藍元用等並特許敘敘封套上

御藥供奉近內出此名具資序比內殿崇班故元用等換其恩例六年二

月十二日詔開門上御藥供奉藍元用張懷德羅崇勳並只充上御藥

供奉二字明道二年四月十八日詔上御藥供奉今後更不差置景祐二

年十二月三日詔前後殿都知押班親戚不得差勾當御藥院嘉祐元年

十二月八日御藥院言珍御脉醫官使張昭明差出曹州看醫勘會條制

不得差出乞自今後如差醫官出外宣醫者乞於不係診御脉醫官內差

撥所責不致闕人祇應從之五年十一月詔勾當御藥院內臣如當轉出

外而特留者候其出計所留歲月優遷之更不許累寄所遷資序非勾當

御藥院而留者其出更不推恩初御史中丞趙鼎言勾當御藥院有還官

至還領團練防禦使者謂之閤轉若不別立規制竊慮干冒恩澤寔不可

止故條約之神宗正史職官志御藥院勾當官四人以入內內侍充掌制藥以進御又供禁中之用凡藥嘗而後進有奏方書則集國醫按驗以聞饋進膳羞祭祀朝會燕饗行幸則扶侍左右廷試進士則主行其禁令封印底首而給納之歲時酌獻陵園春夏頒中外藥及元日生辰致齋升國禮幣則前則為之辦具官首慶賜亦如之凡五年進一官分案三設吏八神宗治平四年未改元七月十九日樞密院勘合嘉祐五年十一月已降指揮今後內臣更不許理大使臣資序內勾當御藥院使臣如合轉大使臣出外特留者即直隸出外日據留住歲月比類優與遷轉應今日已前已理資序者並依已得指揮仍今後更不再與遷理資序從之熙寧三年正月十三日入內內侍省言自今應御前逐處取借官物等今聽與使臣先將白劄子經御藥院覆奏從之初皇城使快行親從官楊吉於新衣庫取官帕事覺論如法三司請付入內內侍省具為約束故有是命二十八日詔將來於集英殿御試舉人其臣僚及考校并諸司幕次依今來御藥院園子內相度貼定去處應合行事件令御藥院檢舉施行三月五日詔中書門下令別定御試舉人封彌式樣送御藥院仍仰本院騰錄兩本分送初覆考官八年八月三日詔勾當御藥院李舜舉服勤左右多歷年所

檢身奉上最為懇謹今依舊御藥院供職仍候將來南郊特許依見寄官
資序奏一子官餘人不得援例先是韓舉之解御藥院補外上以其已寄
諸司副使資序不預南郊奏薦特有是命九月六日詔今後勾當御藥院
使臣滿五周年與轉一官仍不隔磨勘元豐三年六月二十二日詔醫官
使以下診御脉并御藥院祇應者隸御藥院四年三月十七日詔幹當御
藥院資仕宣等押領醫官本殿祇候老宗元等減磨勘年有差以皇太后
服藥累月康復也哲宗元祐六年閏八月十四日詔今後管勾御藥院使
臣年滿合該轉官如未係皇城使者非有特旨不許改轉遥郡徽宗崇寧
二年五月九日詔御藥院可候殿中省六尚建局日除供到湯藥事蘆藥
尚藥局及供應御衣等蘆藥尚衣局外其崇恩宮等處供應及排辦香表
國信禮物御試舉人臣僚夏藥并自來應干事務並依舊主行仍改名內
藥局其見勾當官已係六尚職事者令兼勾當依舊禁中共職今後新差
到官準此高宗建炎四年六月七日詔御藥院見管書寫崇奉祖宗表詞
侍詔等八人今本院依舊各自收管出職請給等差依御書院條例施行
遇闕召收試補學生今後準此餘依大觀二年七月十七日已降指揮施
行紹興元年六月二十二日詔御藥院自今後過道君太上皇帝奉命依令

檢舉設獄四年十月十九日御藥院言本院取賜宮禁生日節序等物色
今來已差留守司及留六宮燕本院已奏分留人吏等看守官物隨從六
宮所有留往六宮生日節序等物色今來合與不合取賜排辦詔許取賜十
一年九月八日御藥院典事王偁等言本院元聖令幹辦官差出及解罷
不得奏訖本院未經試中吏人恩澤各轉一資共不得過三人自來本院
官每遇解罷遵依上條具奏與曾經差使人各轉一資不得過三人欲乞
許依舊遵用本院元聖條法體例將解罷恩澤陳乞收使施行從之十三
年正月二十八日詔御藥院封題書藝學李升依御書院舊法滿十年出
職補保義郎緣渡江之後無已前年代十照文字出職未得今為書寫崇
奉祖宗表詞等在院已實及二十三年有餘特與依已降指揮遞減一官
補授名目出職今後封題學生轉至書藝學祇應十年依此補授出職十
五年四月二十五日詔御藥院今後修設大會錢止輪送諸寺院齋僧更
不修設大會五月二十一日詔幹辦御藥院王連職事全不用心可送吏
部與合入差遣二十年七月二十七日詔御藥院供進湯藥方書不許傳
錄出外如違徒二年幹辦官不覺察同罪許人告捉賞錢五百貫三十一
年十一月四日御藥院言今來車駕巡幸如緩急遇有修合湯藥合用火

燭烘焙藥材等乞下提點六宮事務所權暫請大赴院事畢灑熄緣今未
提點六宮事務官未曾差置止有主管大內公事今欲乞將行宮本院合
用火燭報本處請領事畢灑熄從之孝宗乾道七年五月十八日詔今後
得旨取索錢物於元取索日子內繫寫御藥院官印押仍令御藥院置姓
回歷分明批寫所取物色名件斤兩數目及本庫批上已支同依照會九
年正月六日詔每遇人使到闕幹辦御藥院官與閤門官應奉事體一同
可特與依閤門等處體例每及十番辦一官仍自幹辦本院日為始淳熙
九年五月二十五日詔御藥院諸工匠係專一應奉乘輿服御等物色特
與依製造御前軍器處例不得追呼於他處官司違作并諸般料數行役
等十三年十二月九日詔御藥院減煉金作頭冠作戎具作各一人腰帶
作小木作各一人以司農少卿吳燠議減冗食下勅令所裁定故有是命
御藥院

宋會要

御輦院在右承天門外掌乘輿步輦供奉及宮闈車乘之事以諸司使及內侍三人監供御指揮使一人副兵馬使三人輦官九十二人主分番警御輦次供御輦官七十七人主分番荷御衣箱下都軍使四人副兵馬使三人輦官五百七十八人分給宮中及戚里肩輿車院兵士八十九人掌禁中及諸宮院駕車真宗大中祥符九十四月詔御輦院自來提舉諸司庫務司依例揀選轉填供御次供御輦官並各引見支賜例物今來轉填闕額輦官人數只轉收姓名即不曾揀選依例送軍頭司引見支賜或因過犯改易不得隨例引見仁宗天聖元年閏九月詔御輦院舊管供御輦官九十一人都虞候軍使副兵馬使各一人十將管押節級各三人祇應節級七人今揀選添填供輦官十三人員僚二人十將節級各三人與舊管供御人員相兼管押以備皇太后駕出祇應至二年二月詔御輦院添置供御并次供御將虞候名目以節級依次轉補神宗熙寧初有司定太皇太后出入排大宴輦行龍轎子各一隨行衣褥全管押擡擎并執擎從物祇應其裝著儀注冬夏與應奉聖駕同一百四人供御充管押擡擎祇應五十人次供御五十五人下都皇太后出入排大龍輿一來隨行衣褥全管押擡擎并執擎從物祇應其裝著儀注冬夏與應奉聖駕同六十四人供御

二十三人供御五十五人下都高宗紹興二年十一月二十三日詔行在御
輦院輦官錢貨稿設並係應天府立定依禁衛則例支破內食錢累經裁定可
有元降吏給指揮則例因昨兵火散失可依曆內明州對到稿設并糧料院出
到小曆內人員長行已請日支錢米等第則例今後批用批勘四年七月四日
御輦院言本院下都并車子院共元額一千五百人即今見管止有二百九十
餘人今來故王府等處見於本院差取若行發遣竊慮闕人內中役使欲乞自
今後除大長公主公主外應故王府宮院外宅等處見占人更不抽撥候至替
期及逃亡事故歸院其開額並權住差填候額足日依舊從之五年十月十三
日詔御輦院見今界滿副知孫易依專條未帳入者不候審覆先次補進武副
武副尉應日立界充專知官候界滿將合轉承信郎恩例止減二年磨勘依便
臣比折見管人各依名次遞遷其專副並應今年十月一日立界今後專知官
界滿通及七年有餘依孫易出補減年外如有少短年限人並依條展減先
是本院據副知孫易等狀本院公吏元額七人遞遷至副知二年界滿依本院
東條未帳入者不候審覆先次補進武副尉充專知官應日立界滿轉承信郎
自來即無通理年限昨緣敕令所審覆有記專條前界人吏不知首尾供作一
十四年今來已經裁減立定四人為額係八年出職此元理出職短少六年乞

北附寺監人吏出職有餘人仕年限條法每欠一年磨勘每展及五年降一資軍大將十年教令所貼黃雖依供到事理貼說外即未有許依旨揮令本院如遇過遷出職具因依申明朝廷施行今未副知孫易今年九月終界滿依教令所貼副知界滿短少不及十年合補進武副尉并冉知官界滿合轉承信郎緣有短少年限未有指揮本院契勘公吏已經裁減人額難以依舊出補故有是命九年八月二十六日詔御輦院吏差正額武臣監官一員舊制本院監官四員建炎三年裁減以二員為額內一員差八內官一員差武臣至是以事繁冗從本院請也十一年六月二日詔御輦院所管輦官等有犯勘責罪狀同職官簽書仍從長官依條書斷若犯杖以上或事應追究者送所屬諸廳差破當直輦官輒於數外差占妄作緣由差占同徒二年即于託差借及借之罪亦如之諸幹辦官當內宿過實有緣故若病患聽給假即牒以次官赴赴叅假日補填並從兵部請也十一月七日詔御輦院輦官犯罪合行移降左右廂店宅務今後令本院行下步軍司北附在京口店宅務一般軍分收管十二年正月二十九日詔供御輦院遇閑令本院量度合用人數於次供御應奉下都輦官指揮使長行內揀選投名實及三年五十歲以上兩眼各一十五步見指揮明走跳得無廢氣殘疾外權依供御等摸樣押兩指板過犯已滿之人揀試申尚書兵

部限日審驗乞填闕放行請給供御輦官依本院條以三百人為額過闕於次
供御輦官選年四十歲以上投名實及三年指揮使至長行升揀無過犯及五
尺七寸五分等樣兩眼各一十五步見指明走跳得脹氣殘疾呈驗訖申尚書
兵部審驗揀填本院言難得以此之人故有是命同日詔供御輦官從本院量
度合用人數於應奉下都輦官十將至長行內揀選投名實及三年五十歲已
下權依次供御等樣揀兩指板過犯已滿之人揀試申尚書兵部限日下審驗
充填闕額放行請給供御輦官依本院專條以五百人為額過闕於應奉下都
省內選年及四十歲已上投名實及三年十將至長行升揀無過犯五尺六寸
五分等樣本院言難得應格之人故有是命同日詔應奉下都兩營輦官闕人
先次招填二百人依條揀試不係河東河北陝西并沁遼化外歸明徭人年二
十歲依現今等樣揀一指板及依在京措置條例招收微有杖痕之人逐旋申
解尚書兵部限日下審驗刺填收管依已招新人則例支破請給應奉下都兩
營輦官依本院專條共以一千三百三十人為額及依條過闕招置揀試不係
河東河北陝西并沁遼化外歸明徭人外年二十歲無杖痕及三尺五寸五分
已上等樣兩眼各一十五步見指明走跳得無脹氣殘疾本院呈驗揀選訖封
臂解赴尚兵部審驗刺填本院言今難得等之人故有是命四月二十八日御

輦院言下都輦官二百人依條五尺五寸五分等樣權插板一指招刺即目行在難得年二十及上件等樣之人欲乞特降指揮將見招人降已插一指板外更插板一指庶幾易為招填從之十二月二十九日詔製造大輦成已降指揮於殿前司差撥巡防潛火軍兵五十人管押人在內分番晝夜巡警防護今權隸御輦院管轄若有罪犯據本司施行仍不得別行占破差使如遇依私役禁軍法科罪同日詔供御次供御下都輦官權以執一千人為額供御營二百人次供御營一百五十人下都營六百五十人先是本院言本院專條共以二千六百三十人為額今未行在除應奉輦官并官健依已降指揮權併歸下都營外即日三營見管止有六百三十八人今來又造到大輦一乘每番差輦官九十二人五番合用四百六十人委是闕人故有是命同日詔御輦院見闕供御次供御輦官令殿前司馬步軍司於所管指揮內十將至長行內揀不係三路巡邏強人年四十歲已下不曾犯賊盜及五赤七寸五分并五赤六寸五分等樣各一十五步見指明走跳得無廢氣残疾之人割籍充填闕額其請給衣賜據見今職名各從多給糧審院日下放行仍免中兵部審驗從本院改刺如有

一切拘礙且依今降指揮施行以大輦成本院言闕人祇應也同日詔下都營依紹興十二年正月二十九日并四月十三日降指揮招置支破請給如有不

棟板及五尺五寸五分等樣之人依在京條例給與例物每名支錢五貫文令戶部據合用數目逐旋入本院厝內先次批勘稽查格剌支給同日詔御輦院令翰林院差撥醫官一名每月支給合藥錢七貫文後有闕准此同日詔御輦院監官界終無遺闕與減二年磨勘在京日本院監官四員為額依治平法界終無遺闕減二年磨勘昨緣敕令所審覆本院省記條例無干照見得推賞不行故有是命同日詔御輦院令戶部每月餘本院厝內批勘池表紙五十張大欵表紙一百張小表紙二百張毛頭紙五百張朱紅一張兩於左藏庫請領應副行遣造帳等使用十四年四月二十八日詔御輦院差破白直輦官如輦於數外占破或擅行差借已有斷罪條法自今後若不遵奉並許依所差人數所破請給紐賊斷罪五月四日詔御輦院下都輦官長行周明犯徒罪斷訖移降步軍司比附在京店宅務一般軍分收管今後遇有犯徒罪之人依此先是臨安府斷訖仍降作指揮下名故有是命十一月一日詔御輦院御輦官添作二百五十人為額所闕人數從本院於次供御下都應管人內相親揀選人材堪充應奉之人填闕其次供御輦官止依舊一百五十人為額見闕人數亦於下都輦官內相親揀選充填仍免中駕部審驗所有請給合糧審院依則例日下放行如今後闕人準此其下都見闕人數依前後已降指揮招填從本院請

也十七年四月十八日詔御輦院所管輦官忠佐至長行為係應奉人今後年
及七十與將帶身分請給本營執役養老十九年四月二十七日詔御輦院專
知官曹穎候專知官滿日充身分名目補填短少年月所有本人副知界滿合
補進武副尉候專知官界滿依紹興五年十月十二日已降指揮補授施行其
請給依舊接續批勘今後本院公吏知有短少年月之人依此本院手分押司
副知官專知官四人為額通遷至副知界合先次補進武副尉留充專知官界
滿減二年磨勘依紹興五年十月十二日專降指揮條通及七年有餘出職其
曹穎自入仕至將來專知官界滿出職止及五年有餘其短少年月合行補填
本院言若令曹穎作專副押司官補填即衝改豆界月日及有礙以次年滿人
通遷兼本人所少年條元充手分日短少故有是命二十六年三月二十七日
詔御輦院見今專知官一名數減作副知以次人依此通減僭罷人吏令本院
先次出給公據候額內有開依名次收補以裁定百司吏額也三十年正月十
七日詔御輦院下都輦官減一百人令兵部比擬一脫請受軍分撥排額放停
者聽兵部契勘步軍司神衛軍額請給相同可以比擬安排欲將前項所減人
除願就放停人給據放停外有其餘數目令御輦院開其姓名一面移文步軍
司照會收管充填上件軍分從之二十五日詔御輦院下都特減作五百人為

額今後不許增置招填本院供御次供御下都共以一千人為額供御二百五十人次供御一百五十人下都六百人為額至是減之三十二年三月三日詔御筆院副知朱愿特與依已降指揮補進武副尉出職今後本院副知關運押司官充依舊入仕及七年有餘出補本院狀據副知朱愿狀昨於紹興二十一年十二月內試補充本院手分通遷押司官自紹興二十三年十月一日充副知至界滿及充專知官未滿間省減吏額將愿敦作副知緣愿自入仕至今實及十年有零伏見本院公吏元額四人前後並依專法及紹興五年十月十三日已降指揮通及七年有餘補進武副尉減二年磨勘依使臣法比所出職切詳元有專副二人掌官官物今來數減止愿一名掌管比之前事務繁重已是過三年有零並無分毫闕誤故有是命孝宗紹興三十六年未改元六月十七日詔御筆院庫屋等經雨損漏并庫眼圍墻見今傾側仰兩浙轉運司日下如法修整今後每季差人赴院檢計修整施行隆興元年七月二十三日詔文思院依樣製造到平筆一乘并條永禱事件等可赴御筆院交割施行乾道六年七月二十四日詔御筆院權以七百人為額並令招放本院契勘供御次供御下都元以九百人為額內供御二百五十人次供御一百五十人下都五百人今準前項指揮欲乞將供御以二百二十八人次供御以一百三十人下都

以三百五十八為額九月二日臣僚言今年郊祀儀仗五輅稍備盛禮舊制祀成
皇帝自端成殿備法駕御大安輦還內登門肆赦近有以大安輦費用稍多頗
欲緣飾竊惟遇三歲郊見國之鉅典豈可受惜小費輕議更張乞將來郊祀並
用五輅大安輦一如舊儀庶幾禮文全盛仰祈聖主欽崇之意從之淳熙十二
年八月一日樞密院言御輦院中將來郊祀大禮本院排辦大輦道途平輦腰
輿小輿及差撥肩輦頭冠八寶王爵并執打御前十閣分從物人員輦官等應
奉數為大輦合前九十日教閱八寶合前六十日教閱轎扇合前四十日教習
並係殿前司步軍司差列兵級輿輦官相兼教習祇應務要慣熟至時應奉不
致生疎今已依淳熙三年已降指揮條例每日添破食錢內輦輿下差到職掌
各五百文本院副知人吏各四百文大輦下都大人員教頭大押番各三百文
輦官兵級各二百文八寶轎扇下貼差到兵級營寨頗遠各人量行添破食錢
一百文並就本院厝內批勘仍不理為名色次數自起教日支給住教日罷從
之同日又言將來郊祀承降到大輦上新製踏道一座比之舊管踏道其樣製
稍重亦合增添長闊尺寸若依舊例每番差破八人肩輦五番共差四十人祇
應竊恐人力不勝今乞每番添破四人肩輦五番番計添二十人共差六十人
祇應并添差副都大人員一名同共管轄其添破日支食錢乞依昨本院厝內

已批勘過人員并輦官等則依支破從之十三年十二月九日詔御輦院減次
供御輦二十人都輦官三十人以司農少卿吳燠議減冗食下敕令所裁定故
有是命

宗會要

卷之五

宗正寺掌奉宗廟諸陵薦享司宗室之籍丞簿以上通
簽寺事又有太廟后廟宮闈令各一人以內侍充後改
入內內侍充兩朝國史志宗正寺判寺事二人以宗
姓兩制以上充闕則以宗姓朝官以上知丞事掌奉宗
廟諸陵薦享之事司皇族之籍主簿一員以京官充宗
長齋郎無掌數楷書四人府吏二人驅使官九人廟直
官一人太廟后廟宮闈令三人以內內侍充修玉牒
官無定員掌修皇帝玉牒序宗派紀族屬歲撰宗室子
名以進典三人楷書四人陵臺令以京朝官一員知永
安縣無令事又諸陵有副使都監以內臣充元豐改制

所掌與舊畧同事具職官志

卿一人秩正四品少卿

一人秩從五品丞一人秩從七品簿一人秩從八品掌

凡宗室賜名立名生亡嫁娶注籍纂修三祖下宗藩慶

系文字紹興十二年以修玉牒別創玉牒所凡修纂卿

少丞皆與焉詳見玉牒所設案有二曰屬籍曰知雜吏

額胥長一人胥吏一人胥佐二人指書三人太祖開

寶六年正月以右千牛衛將軍趙崇濟為宗正少卿

凡寺官皆宗姓為之時文班闕宗姓故命崇濟 太宗

淳化三年八月詔兩廟齋宮令本司常切灑掃修葺仍

令御史糾察 真宗咸平二年正月徙宗正寺於延祐

坊 先是置於闕前廊下以地勢狹窄故徙之仍建樓

以藏宗籍 景德二年五月命太常博士趙湘歷戶丞
趙禎同判宗正寺 真宗以宗正職奉陵廟其任至重
是歲趙安易卒帝慎擇宗姓朝臣有才望者領其事以
申嚴恭之意相時知興元禎知通州皆有治聲驛名而
命之又賜三品服銀二百兩月俸皆見給仍別賜錢十
千 七月詔兩廟常令併除穢污務在嚴潔委宗正躬
親提舉 十一月詔兩廟差皇城司親事官並一年一
替 三年七月詔太廟殿上不得令人夜宿止只在兩
廊下其宮闈令各在本廟止宿 九月宗正寺言新葬
一品墳已差守墳戶每有申報望就近取河南府指揮
從之 四年正月詔聽諸司祠祭行事官自今不得於

太廟宿齋每大祀祭用本廟室長齋郎十二人捧俎令
宗正寺預先告報毋得闕事 七月詔太廟除中書門
下行事許乘馬入東神門自餘並禁止如雨許乘馬入
東門從者外門止 大中祥符三年三月詔宗廟新置
帳設什物令宗正寺提舉收掌不得借出外 五年八
月詔太廟祭前一日少府監洗滌祭器令行事官一員
躬親監視 六年五月宗正寺言太廟後次北近西至
后廟有屋舍不賞緊要乞差使臣相度開展寺基從之
十一月詔太廟每親行禮於祿瓊前先上香其香案
設於牙盤前若臣僚行禮亦設香案於牙盤前 七年
八月二十三日詔御史臺不得抽宗正寺職掌 二十

七日宗正寺言太廟齋郎室長自今請於預五大饗行
事無遺闕者減一選全不赴行事者殿一選遇不得放
選注官從之 八年二月詔宗正寺有司奉籍王牒置
他舍故得無損即日命鹽鐵副使段暉擇地營建寺初
在延和坊至是詔徙福善坊自今判寺臣僚不得將家
屬居止又詔自今兩廟郊社如遇祭告委監察官嚴切
鈐束俟禮畢息火燭舊以無事管勾故多差老疾者為
宮闈令自今委內侍省擇幹事者代之每三年無遺闕
即與酬獎仍著為令 四月禮院言聞令係本職常有
祇應不同攝事臣僚望自今有父母喪給暇三日春喪
二日餘並一日如遇祠祭行事內侍省權差人假滿依

舊從之 九月二十三日賜宗正寺殿名曰玉牒殿堂
曰屬籍堂 十月知宗正寺趙世長言宮闈令歆與本
寺官通簽行遣公事宰臣王旦奏宗正卿是趙安仁總
領寺事恐難與內侍通簽望令仍舊帝曰不若依宮觀
例凡事令趙世長與宮闈令同狀申趙安仁據狀單書
行遣 十一月兵部侍郎兼宗正卿趙安仁言新修宗
正寺將畢請以聖祖降臨記并皇宗玉牒諸王屬籍自
王清昭應宮移於本寺堂殿內秘藏仍以漆匣檐牀紅
羅帕幕用輦官擡擎依玉冊例差人前導其諸王屬籍
用寬衣軍人擡擎以紫羅帕幕寺官躬親迎奉從之
九年二月詔宗正寺宜令三司每月給公使錢十五千

是月出度支員外郎權知宗正寺趙世長知河陽令太子右贊善大夫趙廓權宗正寺丞時本寺言陵廟行禮官令大宗正卿一員少卿丞各二員主簿一員時止趙安仁兼卿世長知寺事帝曰安仁嘗叅宰府與世長列銜非便王旦請自今命京官兼主簿郎中已工兼丞給舍已下兼少卿丞郎已上兼卿以為永制世長知事數年忠令兼丞亦似無謂王嗣宗嘗言文用成坐賊死不當使之司宗正望授外郡帝然之自是若卿闕即丞以下行寺事而無知判之名 三月詔侍衛步軍司選刺員兵士二十人節級二人供宗正寺巡宿三年一替天禧元年十一月以衛尉寺卿丞趙鼎兼宗正寺主簿

鼎通判原州召還特有茲授其月給食錢廩米咸優
常數 仁宗乾興元年十一月宗正寺言入內供奉官
秦懷志自陳先差勾當后廟兼充本廟宮閤令秩滿乞
翻獎詔特與遷一資自今勾當年滿更不改轉 天聖
七年四月詔宗正寺應宮宅皇屬男年十八女年十五
令管勾宮宅所申本寺牒入內內侍省差勾當婚姻人
計會本宮宅尋訪衣冠士族非工商雜類及曾犯罪惡
之家人材年幾相當即具姓名鄉貫住止并三代銜迴
牒本寺本寺更切審訪詣實以聞候得旨即送入內內
侍省引見 康定元年十二月十三日同判太常寺宗
祁言太廟內神御物丹蓋牀等不用之物甚多金銀萬

餘兩款乞拆剝金銀仍以宗正寺西太廟宮闈令解建
神御庫令宗正寺就領其事從之 嘉祐三年五月詔
宗正寺自今白身人娶宗室女須三代有官或父祖常
任升朝官而告敕見存者仍召京朝官委保之其已在
任者三代雖不盡官亦聽 六年十月詔知宗正寺即
管勾本司公事遇祠祭許見官屬時以英宗知寺事故
下此制 是月詔以太常南舊府司為知宗正寺解
八年正月以新修宗正寺解為太常寺 先是以英宗
知寺事故特解而帝固辭乃復以為太常寺 神宗正
史職官志宗正卿正四品少卿從五品丞從七品主簿
從八品各一人掌修纂牒譜圖籍之事凡編年以紀帝

系而載其歷數及朝廷政令之因革者為玉牒序同姓之親而第其五屬之戚疎者為屬籍具其官爵功罪生死及宗婦族姓與男若女者為譜推其所自出至於子孫而列其名位者為宗藩慶系錄考定世次枝分派別而歸於本統者為仙源積慶圖錄一歲圖三歲牒譜籍十歲皆修纂以進凡宗子生應授官者撰名以上司封國朝置大宗正司以統皇屬故寺長貳不專以國姓其典領職事止於如此分案二設吏六哲宗正史職官志同神宗熙寧二年十二月二十三日詔近制皇族非祖免以下更不賜名授官只令應舉今後如遇生男女及有死亡者即令開報逐祖下襲公爵者令各置籍纂錄

歲終上玉牒所其未出宮者仰依舊入大小學 三年
六月八日詔今後應有外居皇親後下表章並閣門收
接通進舊居舍屋仰宗正寺勘會本宮院兒女多屋宇
少者趙那均給 元豐六年六月二十九日詔宗正寺
修玉牒照用日歷所文字並指定所書事今本所節錄
其闕防漏泄並依日歷所法 九月十一日詔以監察
御史楊畏為宗正寺丞仍詔宗正寺除長貳外自今更
不專差國姓官蓋自有宗司以統皇族也 哲宗元祐
元年正月九日宗正寺言玉牒官黃履奏自神宗皇帝
登位已來玉牒屬籍類譜並未修歆乞將合編年分同
熙寧十年至元豐八年三月初五日終準式編修從之

九月十六日宗正寺言既許主簿通管寺事竊恐亦合依太常寺國子監例止通管雜務其編纂圖書乞依舊例丞纂修從之 六年八月十二日監察御史安鼎言宗正寺屬籍有號宗藩慶緒錄者按慶緒二字是唐安祿山子之名今以為皇朝本支牒譜之目其為膠庠甚矣乞賜改易詔改名宗藩慶系錄 七年九月十四日宗正寺言本寺令宗室無服親運名非上下同者如立之與宗立之類及音同字異皆聽撰祖宗袒免已上親見依上件令文撰賜名外今來非袒免親既許本家撰名竊慮員數日增取名漸多若令依上條一一照對迴避必至拘礙訓撰不行今欲乞令太祖太宗秦王下

子孫無服親各於本祖下即依令文撰名若係別祖下無服親除所連名自合別取字外餘雖犯別祖下本字並許用所貴久遠訓撰得行又言宗室撰名自來並用兩字內取一字相連所以別源派序昭穆也昨自熙寧中立法非祖宗祖免親更不賜名授官後來逐時準大宗正司關到本家所撰名多是重疊有至數人而共一名者又或與別房尊長名諱相犯或兄弟不相連名或只取一字為名而偏傍不相連者名稱混淆難以分別昭穆之序竊恐年紀寢久流派逾遠譜籍漸無統紀除重疊共一名者昨來寺司申請已得朝旨見令改撰外所有犯別房尊長名諱兄弟不相連名并以一字為名

恐亦合改撰。欲乞逐宮院將見今名犯尊長諱并字不相連及單名者並令改撰。仍從本寺定取一相連字取名稍寬者。開宗正司令依倣撰名所貴稍得齊一。並從之。二十七日宗正寺言玉牒宗藩慶系錄仙源積慶圖卷秩已多。內宗室子有未名而卒者。但曰不及名。既無官爵事迹可考。正欲於其父名之下總計其數。注入宗室女早卒者亦如之。詔可。紹聖三年五月十三日宗正寺言請太祖下有服親外其餘並連伯字。太宗下子孫連季字。人數未多。乞依前詔止連一字。用初賜不字訓名庶幾不致違戾。又宗正寺丞宗景年言請宗室賜名及非祖免親本家命名於本祖下有服親即音同。

字異許用於別祖下無服親非連名即雖本字亦許用其稱祖者以宣祖父子秦王下為一祖太祖父子越王楚王各為一祖太宗父子魏王昭成太子魯陳蔡韓吳王下各為一祖其連名者隨祖宗之父子而下雖兄弟數多並為一字相連庶幾分祖字稍寬不致乖戾從之徽宗崇寧三年十月十四日宗正寺丞徐處仁言准令宗室宗婦宗女應修纂事迹歲九月上旬開大宗正司取索又仙源積慶圖每三年宗藩慶系錄每一年並於歲旦開送內閣奏聞明年合進圖冊已依開大宗正司及河南應天府敦崇院請皆立朝會從之 大觀三年三月二十一日詔宗室並依行第連名如連士字之字

之類其單名者限十日改正 政和三年正月十九日

宗正寺奏訓撰宗室名之字子從公子字子從伯不字
子從善公字伯字善字之子乞依公字等例許撰連名
從之 六年六月十六日知鄧州京西南路安撫使許
份言竊以宗正掌國屬籍而所掌祖簿凡二十有一宗
室蕃衍而遽除婚姻等有司全缺闕報致注鑿失實無
所稽考修纂玉牒類譜宗藩慶系錄仙源積慶圖每旋
行取索祖簿幾成虛文乞許令宗正寺重別取索增廣
秋數編錄應有合注鑿之事內則吏部大宗正司諸官
院外則外宗正司及宗室所任州軍日下闕報銷鑿稽
遲者嚴立法禁詔依所奏增廣秩數仍令宗正少卿問

丘籲措置 八月十四日宗正寺卿閻丘籲奏修纂玉牒屬籍歌自祖宗以來每朝皇子皇女及親賢 華宅各為一秩三祖下十九宮院太祖皇帝下以德惟從世令子伯師太宗皇帝下以元允宗仲士不善汝魏王下以德承克叔之公彥各依昭穆次序分位增廣秩數如有不連名及連名與別祖字行稱呼交互有礙者並限三日改正從之 七年八月十四日宗正寺卿閻丘籲言為許份奏乞重別取索增廣玉牒屬籍祖簿秩數等畫一內一項宗室女生亡遷轉出適宗婦成禮合其三代名銜成禮月日等報寺入鑒祖簿有司多不畫時闕報自來未法禁緣大宗正司西南兩外宗正司不報

已有立定杖八十斷罪乞今後供報漏落官司人吏並
依已立內外宗正司斷罪約束指揮施行若外住及外
任宗室失申罪亦如之仍委大宗正司每日一次據宗
室所檢舉行下并報本所以憑銷鑿從之 宣和四年
二月二十九日宗正少卿趙子崧奏神宗哲宗兩朝帝
系類譜未曾編纂乞就寺委官詔差子崧至九月成書
進呈送宗正寺玉牒殿寶藏詔子崧特轉一官 五年
七月十一日臣僚言宗正所以崇奉玉牒元豐董正治
官虛長貳不除專以承聽寺事蓋與太常祕書號為三
丞其選甚清自來率用館閣英俊以重屬籍之寄比來
用人變輕頗失本旨請今後宗正丞依太常祕書丞選

差 欽宗靖康元年五月十八日詔宗正寺丞替成資

闕 高宗建炎三年四月十三日詔太常少卿一員兼

宗正少卿丞簿並罷 同日詔宗正寺吏人減半 紹

興二年七月二十八日太常少卿兼宗正少卿李易言

本寺昨緣渡江散失玉牒祖簿等文字今相度欲乞令

大宗正司西南兩京外宗正司及內東門司委自逐司

取會應在州軍縣鎮寄居待闕見任并隨司南班外官

等同宗室三代生亡年月日時官爵及叔伯弟姪兒孫

等并宗女出嫁夫係何官位姓名宗婦係何人家女逐

一開具保明報寺本寺置籍依逐祖字號宮院編類成

策如續次有生亡等事并有軍前回歸之人亦行報寺

以憑書注入籍免致散漫從之 三年四月二日宗正寺言據西外宗正司中州軍縣鎮等處本司各無統攝難以取會本寺今相度欲令大宗正司兩外宗正司依元立宗支式樣開牒諸路運司移文行下諸處委本處見任宗室或見任官一員取索縣鎮州軍次第申轉運司轉運司再行保明詣實申所管宗正司驗認無偽冒差漏報本寺以憑編類修纂從之 六月二十三日知大宗正丞謝伋言宗正之掌圖牒所以分源流之遠近定世次之疎戚比年以來雖間置卿漫不省察宣和之間有乞附屬籍而非宗室者令圖是也近年以來亦有詐稱宗室而興兵者不虞也是遠慮過防必於無事之

際世系遠近當使天下明知之漢律郡國歲因計上宗
室名籍今宗正有寺而無官以太常惠治望今宗正寺
下州縣取索名籍編修玉牒或為宗室世系名籍遠近
之序頒天下不惟有礙御寶條令竊慮若使天下明知
宗室名籍服屬遠近必致浸生偽冒官司無以考證
近日根勘偽徐王緣不知服屬遠近遂至敗露禮部令
勘當欲依今來所陳事理施行朝旨送禮部行下宗正
寺依已降指揮候諸路取索報到編修成籍日中尚書
省 九月十四日詔取索宗室生亡官爵嫁娶等事遂
州專委通判一員 十二月九日詔復置宗正少卿一
員 四年九月十日宗正少卿范冲言宗正寺依條訓

撰宗室賜名具無重疊申吏部學士院看定咨報中書
省取旨施行緣渡江之後散失簿籍無憑照據重疊歌
乞自今後如遇訓名本寺撰訖從本寺行下大宗司勘
會如有重疊別行改撰從之 五年五月二十六日詔
宗正寺少卿依一般寺監破衣糧親事官四人 閏二
月二十七日詔復置宗正寺丞一員仍除知婺州金華
縣孫緯填闕以緯收得宗枝事迹諳曉編類修纂屬籍
次第從宗正少卿范冲請也 四月二十六日宗正少
卿范冲等言宗枝文字參合照應編類修纂共成下項
一歌以仙源慶系屬籍總要為名一太祖皇帝太宗皇
帝一秦王一母氏一始生一宗婦一宗女一宮院一官

爵一壽考一賜謚如可依此修纂乞降下遵守從之

五月七日宗正少卿范冲等言本寺見遵依聖旨編類修纂仙源慶系屬籍總要有申請事件並從之 一今

來將已降指揮宗正司取索報到宗室等家狀與本寺丞孫緯收到從來宗正等文字一處奉照編類修纂所有應宗司未取索繳報到州軍去處數乞朝廷嚴賜行下三京宗司依元立到式樣催督遠行取索勘驗保明報寺一合用紙劄朱紅令款據每月合用數目從本寺直牒臨安府收買供送一本寺除職級見有二人外其舊額手分貼書楷書各四人並各減半了當今來止有知雜屬籍兩案內手分各有壹名款於主行編修屬籍

案內復置手分一名於本寺守關貼書內不候及年先
次隔等便行試補填闕一次如無合格之人即於諸寺
監庫務及應千官司去處踏逐指差內抽差到人候及
一年若不願歸司者即與撥填入額其請給遷補出職
並依本寺見行條法一乞下左藏庫量行更降錢三百
貫文付寺充和顧及審量食錢并雜支使用其使不足
申乞接續更降 六月十六日詔宗正寺編修到太祖
皇帝慶系令先次進呈 八月二十四日宗正寺丞孫
緯言修纂祖宗慶系宗室所供文字即無皇后與公主
似為闕典緯欲將本家收到本朝諸書檢討編類別作
一項修入慶系總要從之 十一月二日詔宗正寺編

類修纂仙源慶系屬籍總要已投進了當專一修纂官
寺丞孫緯與轉一官胥長胥吏各支絹五疋胥佐三疋
貼書楷書二疋 七年七月二十四日宗正寺言太祖
皇帝下希字子歆連作與字太宗皇帝下崇字子歆連
作必字親賢宅居字子歆連作多字 華宅卿字子歆
連作茂字魏王下夫字子歆連作時字從之 八年十
二月十七日詔宗正寺編修太祖太宗秦王下仙源慶
系屬籍總要令接續修纂合行事件並依已得指揮
本寺少卿張絢言昨來編修太祖太宗秦王下仙源慶
系屬籍總要令來已及二年有餘諸處文字漸多若不
來時接續修纂切慮歲久文書浩渺卒難考正編類費

工欲將續到宗室事迹與已編修屬籍再行參合照應
編纂故有是命 九年八月十五日詔令東京留守司
搜訪屬籍文字繳申尚書省從封司員外郎薛嘉言請
也 十年閏六月二十九日宗正少卿江公亮等言承
朝廷送下搜訪到東京已經進呈宗藩慶緒錄并宗室
班位宗女宗婦簿共一十五冊約二千餘板本寺再行
參照得與近來取會應諸路報到事迹等各有異同及
缺文差訛去處頗多委是文字浩大卒難盡行編修今
欲乞依紹興五年本寺丞孫緯已編修進呈體例將太
祖皇帝慶系先次進呈其太宗皇帝慶系并秦王慶系
續行編修進呈兼契勘紹興五年係修寫二本一本進

今

入一本在寺崇奉合檢准在京日進呈玉牒條例係入
內內侍省差承受官一員進呈畢迎奉安奉今來編修
到亦係祖宗慶系今乞比附進玉牒條例更不乞差承
受官外止乞令本寺官進呈訖迎奉赴寺安奉從之

十一年八月十一日詔宗正寺編修太祖皇帝下仙源
慶系屬籍已進呈訖少卿江公亮丞邵大受各與減磨
勘二年人吏量行犒設 二十六年十二月二十日詔

宗正寺復置胥佐一名守闕貼書二人額外習學貼書
二人並行減罷其胥佐貼書依名次教減候有闕次第
收補以裁定百司吏額也 二十八年四月詔宗正寺
修纂宗藩慶系錄候將來接續進呈仙源積慶圖日一

就進呈 二十九年閏六月十六日詔宗正寺胥長滿
五年通入仕及三十年依太常寺條格體例補將仕郎
依條解發出職 八月二十三日詔玉牒所宰臣提舉
依舊修書官一員同宗正卿丞修纂更不置檢討官
三十二年閏二月二十九日宗正寺簿除不預修纂玉
牒外其餘職事相兼管幹更不支破折食錢 以上中興
會要 紹興三十二年孝宗已即位未改元十一月二十
四日詔宗正寺職掌減一年出官該遇皇帝登寶位也
孝宗興隆元年七月二十六日詔宗正寺併省主簿
一員見任人許終滿令任已差下依省罷法從右諫議
大夫王大寶等議也 八月三日宗正寺狀依指揮條

具併省吏額見管胥長一胥史一胥佐二人貼書二人
楷書二人今乞從下減楷書一詔依見在人且依舊將
來遇闕更不遷補二年閏十一月二十七日詔宗正
寺丞簿今後並依舊制以上乾道會要玉牒所宮闈
令陵臺令

宋會要 太宗正司

仁宗慶厯四年二月二十三日太宗正司請自今後皇族凡有違慢過失並從本司取勘施行從之 至和二年五月以皇子汝南郡王子右領軍衛大將軍宗師為嚴州刺史北海郡王子右監門衛大將軍宗喬為右領軍衛大將軍皆以其父領太宗正久因乾元節推恩特遷之後毋得為例今太宗正司每歲有與子減磨勘恩例乃緣其制也允讓允弼領太宗正在景祐三年七月汝南郡王即允讓扶風郡王即允弼也 嘉祐六年正月七日判太宗正事允弼言自創置本司所降宣敕劄子指揮及約束條貫甚多獨未編脩欲望美潭王宮教

授周孟陽燕王宮伴讀李田與臣編條對讀裝寫乞差
都監任修古監勒從之 英宗治平元年六月十三日
詔夫明德以親九族正家而刑萬邦古先哲王罔不由
此朕嗣守丕業率循舊章惟皇屬之敦和命宗臣而董
正惟累聖承繼百年咸隆荷宗社之慶靈茂本支而蕃
衍念其性本於仁厚宜廣學以勤脩願其日益於衆多
必增員而統理故外已詔於儒學各選於經師而內仍
擇於親賢共司於屬藉庶乎叶贊其職並修厥官糾乃
非違先以正而為率勉夫怠墮惟其善而是從式孚于
休以副予意英宗既命增皇親宮院學官以謂宗室之
盛數倍於前而宗正司事亦煩多乃增置同知大宗正

事一員選宗惠為之仍降是詔九月二十五日判大宗
正事允弼等言詳定到皇親聽書等賞罰規式詔依所
定施行 三年四月以懷州團練使宗惠為恩州刺史
罷同知宗正事止其朝參坐女僕相告訐語不順故也
是月以密州觀察使宗旦同知大宗正司事 景祐三
年置熙寧三年五月併管勾睦親廣親并提舉郡縣主
宅所歸大宗正司 神宗正史職官志大宗正司知及
同知官各一人以宗室團練使以上充丞二人以文臣
升朝官以上充掌宗室之教法政令以行藝訓道而敦
睦之受其辨訴之事而糾其失微罪則先劾以聞即法
例有疑不能決者同上殿取裁若官邸因事出入日書

於籍季終類奏歲錄其存亡之數報宗正寺記室一人
典箋奏講書教授十有二人分位講教兼領小學之事
自熙寧初置丞省記室講授員增給以祿而大宗正歲
與子若孫推恩及十年則加褒賞由是宗子屢有中進
士第者人自矜飭以勸學焉分案五設吏十有一正史
職官志同神宗熙寧元年二月一日以皇伯吉州團練使宗
惠權同管勾大宗正司事候允弼服闋日依舊三年
二月中書門下言大宗正司請置丞二員于睦親廣親
宅從之命都官員外郎張稚圭知丞事繼以光祿寺丞
李德芻同知丞事五月十八日廢管勾睦親廣親并提
舉郡縣主宅所歸大宗正司從知宗正丞張稚圭請也

先是宗室舉動皆為管勾內臣所拘制稚圭始請罷之
上令并罷郡縣主宅提舉六月十四日大宗正司言行
省管勾睦親廣親并提舉郡縣主等宅所並令本司依
例一面管勾今有合行約束及廢置八事乞指揮詔內
除應諸色人并姨媼犯杖罪以下乞從本司一面勘斷
不行外餘並從之續錄上云廢置四年二月六月同知
大宗正丞李德男言欲乞自今後皇親應有內外親族
吉凶吊省合出入事件編成則例更不逐旋奏知及日
申本司只令勾當使臣置歷抄上赴大宗正司簽押其
榜子每月類聚奏聞從之 五年七月六日詔自今宗
室犯過失杖以下委正司劾奏二十二日知大宗正司

宗旦言宗室所投文字或違例礙條退回即生詆怨或情有可憐而例無其事或事涉違冒而理或可容乞自今有疑難事許上殿敷奏或許同見執政稟議從之

八年三月六日詔宗室換官及外居者隸大宗正司管勾五月六日詔知大宗正司官及十年取旨仍歲與一子若孫遙郡刺史以下官減二年磨勘七月二日皇伯昭信軍節度使知大宗正事宗旦降授彰化軍節度觀察留後忻州防禦使同知大宗正事宗惠降授霸州團練使坐不察世居陰謀乃有此責同知大宗正丞事宋靖國諸王宮記室參軍王慥皆坐累奪官一秩

九年五月十四日中書門下言大宗正司官候管勾及十周

年取旨勘會同知大宗正司宗惠治平元年六月差同知大宗正事至二年七月再差同知所是先管勾月日合與不合通理詔許自權同管勾年月通理仍依宗旦例展二年取旨元豐三年八月二十六日詔判大宗正司宗旦舊例添厨食料雖有後條衝革可以見領宗正特給之他官雖等非職事同者無得援為例五年二月十五日武昌軍節度觀察留後同知大宗正宗惠進封江夏郡王知大宗正武勝軍節度觀察留後宗晟同知大宗正十一月十八日詔大宗正司不隸六曹其丞屬聽中書省取旨差七年六月二十七日以安化軍節度使同知大宗正事高密郡王宗晟知大宗正事

相州觀察使宗景同知大宗正事 哲宗元祐三年四

月二十六日詔宗室嫁娶依舊制大宗正司勘驗 四

年詔宗室越本司訴事者罪之 紹聖元年七月七日

詔知大宗正司宗正司宗晟管勾實及十年合得恩澤

特與回授長男吉州防禦使仲御除府州觀察使 二

年八月七日三省奏事上曰皇族但習富貴或弗能以

禮法飭其下獨同判大宗正司宗景家法甚嚴茲可佳

也輔臣對曰景 領宗事十餘年職事亦修聞其德性

安和不以爵祿自驕可以勸率宗親上曰可加使相仍

進封郡王制以宗景可特授開府儀同三司判大宗正

事特封濟陰郡王 三年七月十一日禮部言乞宗室

袒免親授外官人若未曾參部者並依宗室例令大宗
正司管轄從之 徽宗宣和四年三月二十日尚書省
言判大宗正事江夏郡王仲爰等奏本司自熙豐而來
三司至六曹非相統攝於本司皆行公牒昨來吏部司
封不依上條於政和五年創行請申將合取會事務不
行公牒直押貼子付本司取索緣本司即非司封所隸
既非所轄自當公牒取會欲望降旨令司封遵依元豐
舊制施行從之舊置判大宗正事同判大宗正事知大
宗正事同知大宗正事知大宗正丞事同知大宗正丞
事各一員令置判大宗正事知大宗正丞各一員舊置
主押官一名押司官一名前行一名後行一十二人正

貼司一名下脫
守關正名貼
司一名

名貼司一十一人守關正名貼司四人私名貼司一十
人今置主押官一名押司官一名前行一名後行七名
正名貼司一名掌本司事務士案係掌行南班宗室庶
勘轉官襲封及總麻袒免親嫁娶房卧錢宗室賜名授
官宗女夫乞官郡縣主奏薦遺表恩澤宗室乞岳廟差
遣換官降生立名等事務戶案係掌行南班宗室請受
非袒免以下親降生分割財產嫁娶房卧錢并宗室出
磨添破陳乞孤遺錢米并覈實諸路孤遺錢米等事務
儀案係掌行宗室朝參主奉祠事陳乞入道為尼及太
廟五饗三獻奏告等行事差官并宗室聽請量試贈官
南班差藥院等事務兵案係掌行宗室差親事官兵士

省馬等事務刑案係掌行宗室陳乞敘官除落過名作
過犯罪拘管鎖閉年滿放免等事務工案係掌宗室外
住修造本司應雜事務 高宗建炎三年四月六日知
大宗正丞孫逸言南班環衛官宗室已降指揮權於洪
州置司所有宗室及本司官吏請給并居住屋宇乞依
先置司江寧府已得畫一指揮施行請給乞令本路轉
運司於上供錢內應副屋宇乞從本司於本州條官屋
舍并寺觀內量行標撥從之十四日知大宗正事仲琮
言昨因皇帝駐蹕南京即令本司先次敦率南班宗室
渡江前來江寧府權行置司契勘江寧府邊江疆界逐
時兵馬往來駐劄少得係官屋宇見今宗室分撥在寺

舍居止緣本司所管宗室類多南班近屬伏望特令於僻靜去處如本路信州或江西路處州權行置司令宗室往彼居住若謂環衛官不當遠去闕庭即乞依已得指揮令臣選擇老成有德行者十數人留行在以奉朝請其家屬除願留自隨者外其餘只令與衆宗室於所指州居住所有宗室并本司官吏請給等並乞依昨來移司江寧府已得劃一指揮詔依令虔州置司七月三日知大宗正丞洪子陽言在京南班宗室前往東南擇寬廣州郡置司居住本司遂陳乞前來建康府當時隨逐本司南班宗室共三十餘員其餘願留京師者朝廷亦許之自此本司遂分為兩處凡行移及朝廷諸處取

會文字事于兩處者其應報多不得圓備不免途中往復至于再三可以結絕動至經年近者數月人吏更番往來則互有不知首尾之托況今日京師糴貴百倍其他物價類皆翔湧宗室何可久留乞令在京宗室與本司依舊併而為一庶無行移往返人吏更番之弊宗室易為檢束知宗仲琮契勘若將東京本司并在彼南班宗室與行司併而為一則宗室無致散漫人吏便於行遣從之 四年六月八日大宗正司言西外宗室已到南雄州置司月支錢三千餘貫米二千餘石大宗正司移廣州未見得合支數目雖許用上供錢見並無合用錢米詔士儼并南班官除合破使臣人從依已降指揮

並減半外仍仰本路漕臣將合支請給那融應副十月
十二日大宗正行司言近被旨虔州置司切慮到彼官
司無憑應副道路迢遠難以旋行申請候到吉州或體
訪得虔州若有瘴氣或有盜賊逼近欲乞臨時擇穩便
州府逐急遷移前去其宗室并官吏等請給令本路轉
運司并本州應副有旨並依先據知虔州守倅親來報
虜騎已至萬安縣州民驚擾勢相逼脅慮有不測本司
已往廣州置司訖其宗室并本司官吏等請給屋宇等
令本路轉運司并所至州府並令應副施行從之 紹
興元年十月九日中書門下省言大宗正司見在廣州
西外宗正司已移司湖州南外宗正司見在泉州置司

所有行在宗子見今無官管轄詔行在權置宗正一司
差趙仲蒸權行主管二十日權主管行在宗正司趙仲
蒸言被旨差充上件職並不辟置官屬欲乞正差手分
一名貼司二名充行遣文字從之 二年正月十四日
尚書省言大宗正司在京日止係一司差近上宗室主
判昨因巡幸權移廣州置司續降指揮以行在宗室無
官管轄權置宗正司差官一員權主管緣一司案牘並
在廣州其宗子等陳乞請受補官恩澤婚嫁等事行移
取會往復留滯及有不遵條法賭博私輒搔擾官司宗
子合要近上宗室充正官彈壓兼廣州見管南班宗室
並係近屬理合移赴行在詔仲湜除兼判大宗正事士

懷除同知仍令仲湜將帶漢安懿王國廟官屬等士儼
并見管宗室官屬等並赴行在候到其行在宗正司官
吏並罷四月十八日詔諸宗室非袒免親詐稱袒免親
陳乞起支請受者論如詐欺法宗正司保明審驗不寔
與同罪著為令以戶部言宗室有詐稱袒免親妄經所
屬陳乞給厯放行請受故也六月二十一日知臨安府
盧知原言訪聞大宗正司及南班宗室目今逐旋前來
行在緣修建宅舍尚未了當全無安泊去處欲將同文
館及明慶寺廊屋應副候修造了畢依舊詔從之即不
得多占間數及損壞屋宇十月二十四日大宗正司言
修蓋新宮乞依舊以睦親宅為名從之四年正月十

五日檢校少保光山軍節度使同知大宗正事士儼言
大宗正司以臣敘銜在同知大宗正事令時之上緣令
時於臣為兄今躋次非宜尊卑失序難以風勵宗屬竊
見祖宗法大宗正司官三員如仲爰係判仲渙係知仲
議係同知皆以職事相壓今臣與令時並係同知自合
以臣在令時之下况頃先父仲御係節度使同知而宗
粹係觀察使為知宗其宗粹係先父仲御族叔遂以尊
卑相壓更不論官序乞賜改正從之仍令學士院降詔
正月二十九日寧遠軍承宣使同知行在大宗正事安
定郡王令時言准大宗正司牒士儼奏乞敘銜在令時
之下有旨特依契勘在閨門之內別有長幼之序於朝

廷自有官資高下之列今宗正司正當奉行條令風勵宗室若使冒處有礙官制伏乞改正詔不允二月二十六日吏部言大宗正司所乞宗室到部注擬既本司見今未有干照見得服紀自合令參部人指定官院三代名諱會問從之十月十二日知大宗正丞胡如堽言本司前後蒙朝廷送到有罪合拘管宗子人數不少今來本司已得從便指揮若將帶隨行切慮道途難以照顧別致生事欲乞將見拘管人先次發赴而西南兩外宗正司拘收庶免踈失從之五年六月十六日詔知大宗正丞事依宗正寺丞作職事官支破請給七月四日知大宗正事士儼言近除安定郡王令玘同知行在大

宗正事令玘雖係觀察使於士儼為族兄欲乞敘位在令玘下從之仍令學士院降詔九月十一日知大宗正事嗣濮王仲湜言乞將本司人吏依行在百司例支破膳家食錢糧料院狀檢準敕自今日已後官司吏敢輒稱養膳不著乞增添請受以違制論雖有請降到指揮亦仰戶部執奏不行契勘大宗正司乞支破人吏膳家食錢委有礙前項指揮詔特依宗正寺人吏等第支破膳家食錢仍免執奏六年四月十三日禮部言非袒免宗室訓名係宗正司報宗正寺如今後宗正事參照得却有同名宗室乞令本寺分明開說重疊因依報大宗正司別行點定回報宗正寺施行從之八月三日同

知大宗正事士儼言伏觀安郡王令應同知大宗正事
有司循習故常以官序列士儼於令應之上緣士儼視
令應為族兄若從常制實乖恩義況令時令玘亦緣官
序不倫已曾陳乞令士儼序位逐官之下欲望許令令
應序位在士儼之上從之仍令學士院降詔獎諭 八
年五月二十二日詔仲偁除知大宗正事人從除置省
官外並特依仲湜體例施行 十年二月七日臣寮言
伏觀近降指揮許侍從官舉所知各兩人獨於宗族未
許薦拔欲望許兩宗官亦各舉所知宗室三數人以待
朝廷任使詔許各薦二人 十一年四月三日光山軍
承宣使同知大宗正事士樽言伏觀臣寮奏乞宗官各

舉所知宗室三數人以待朝廷任使紹興十年二月七日有旨許各薦二人士樽承之大宗竊慮亦合依準上件指揮宗子才能之士協于公議者具名上聞以備任使庶幾仰副朝廷敦激勸之意從之九月四日同知大宗正事士会士樽言行司間有公事不可再決者申請往來定成留滯欲望許士会等自今後輪那前赴行在大宗正司稟議庶免別致生事詔遇有職事赴行在本司令奏取指揮十二年五月六日知大宗正事權主奉濮安懿王祠事士会言行在睦親宅趨赴朝參南班宗室元係一十七員今止有一十三員後來雖申取指揮令士街等赴行在趨赴朝參又緣士街等並以病免

今相度欲乞據見闕員數於紹興府行司南班宗室內
選擇循中規矩別無疾病可以赴朝參之人具名申取
朝廷指揮仍乞今後遇有行在睦親宅赴朝之宗室事
故准此施行庶免逐時紊煩從之 十三年二月二日
詔今來見行正殿等禮儀其宗室正任與外官正任係
間班起居可將紹興府大宗正司正任並發赴行在令
奉朝請閏四月四日詔今後字子除依條合該賜名人
外其餘並限一季本家具名一二十字經所屬陳乞申
大宗正司照定為名以宗正少卿段拂等言宗室名犯
重疊者多故有是詔十一月三日知大宗正事權主奉
濮安懿王祠事士彥言宗司近承准玉牒所取會宗子

宗女宗婦年甲三代等事本司遷徙以來文籍散落雖
逐旋供報往往未得圓備兼自出京之後宗子寓居四
方者其所生子孫分散仕宦而間有未曾申明本司者
欲望下諸路轉運司令所在州縣不以寄居見任應及
請錢米宗子各具是何宮院及三代年甲兒女嫁娶誰
氏等申行在大宗正司并紹興府行司注籍照會應令
後宗子參部或赴官或經過置司處並令參見宗官仍
具脚色狀一本赴司供納不唯有以稽考亦足以見其
履歷能否如有功罪顯著之人聽具名申尚書省以備
朝廷升黜或有違戾者亦乞具犯人奏劾施行庶使人
人自重可以關防仰副陛下置司糾合之意從之 十

五年八月二十二日同知大宗正事士穉言南班宗室
在外居住人若非換官其出入並依在官法令在外各
無門禁欲望今後外居南班宗室有犯約束取旨拘收
入宮居住如情理稍重奏裁從之 十六年二月九日
詔同知大宗正司士穉職事修舉可與減三年磨勘
十七年二月二十日詔同知大宗正司士穉職事修舉
可特轉行一官九月十七日知大宗正事權主奉濮安
懿王祠事士穉言大宗正司在東京日自有置司去處
近年以來遷徙不安只於宗官廨宇內隨宜擗截委實
窄隘丞官亦無治事之所緣本司所掌內外諸州軍宗
室宗婦宗女生亡嫁娶補官請給及諸錢米帳狀干照

等文字事體至重左近接連居民草屋寅夕不便欲望
踏逐寬廣去處修葺或未有去處乞下臨安府相驗見
今置司處如有居民接連依倉場庫務事體除打量空
地及廨舍內蓆草屋亦乞改修瓦屋免致踈虞詔令臨
安府措置十九日詔福州觀察使士穠罷同知大宗正
事提舉江州太平興國宮職事不修累致詞訴故也
十九年九月十八日詔華州觀察使士街差同知大宗
正事令行在供職所有差破宣借兵士并請給等並依
士穠士穠已得指揮施行 二十年八月十二日詔皇
叔泉州觀察使同知大宗正事士街特授安慶軍承宣
使依前知大宗正事以磨勘應遷也十六日安德軍節

度使聞府儀同三司萬壽觀使權主奉濮安懿王祠事
士会言臣陛辭之日恭聆玉音論及行在宗官今有臣
所知廣州防禦使士鑑游心藝文練習世務若蒙差填
在宗官見闕員數委之表率必能展盡所長以副職拔
詔從之 二十二年七月二十五日詔同知大宗正事
士鑑應住支支賜賞賜米麥公使請給等並特依士会
已降指揮全行支破十二月十一日詔大宗正司并紹
興府行司知宗權通以兩員為額士会闕更不差官
二十三年閏十二月四日詔同知大宗正事士鑑職事
修舉依士会例與轉行一官 二十四年九月二十七
日禮部言萬壽觀申檢準大宗正司條遇元日寒食中

元十月朔冬至差南班官詣萬壽觀朝拜緣本觀後殿見安奉會聖宮章武殿祖宗神御合與不合朝拜尋下太常寺勘會每遇元日寒食中元十月朔冬至差南班宗室朝拜萬壽觀已有立定條法外所有萬壽觀後殿見安奉會聖宮章武殿祖宗神御其所差南班宗室亦合朝拜緣本寺自來未有該載朝儀式今隨宜修立是日令所差南班宗室先詣萬壽觀殿下兩拜訖詣香案前揖笏三上香執笏復位再兩拜訖退次詣後殿會聖宮章武殿下朝拜上香並如朝拜萬壽觀之儀從之二十六年三月二十八日詔大宗正司不限文武如有忠義孝友文行薦謹政事剛明可以立治功可以為時

用薦之於朝以備顧問先是安定郡王令衿奏請故也

二十七年正月二十五日知大宗正丞喻樗言近降

指揮宗子宗女宗婦應干恩數合請於宗司者其申陳

及保明等事狀專命臣寮分門編類立為定式緣上件

事理並隸本司所掌詔令敕令所同本司官編類 二

十九年三月十七日安慶軍節度使同知~~太宗~~正事士

錢言與親兄士街同任宗事而兄士街見係承宣使自

來宗司文移以官高下列街乞依士儼例於士街之下

列街從之 三十年四月九日詔恩平郡王璠已除判

大宗正事其合行事恩數請給並依見行條令及士儼

例施行九月九日安德軍節度使同知大宗正事士街

言合破內知客一員乞依同知士錢下內知客添給茶湯錢一十五貫并合破袍笏祇應伏覩同知士錢下差到殿侍充袍笏祇應見放行驛料今來已差到殿侍四人即不敢援例止乞每月各人特添給茶湯錢一十貫從之 三十一年二月二十一日詔令大宗正司選擇保明宗室二員代西南外兩司見任人先是臣寮言西南外宗置司泉福所以糾合天支訓飭同姓也比有漳州百姓黃瓊商販南番其父客死異鄉物貨並已乾沒空舟來歸所有逋負官司追索估賣其舟知宗士衍借名承買必有委曲小人迫切不能訴於州縣監司此所以不遠數千里銜冤抱枉投匭而赴愬比聞朝廷行下

本路提刑雖先給還其舟而前人所負倍稱之息蓋有
未易償者如此則是舟必折而入於知宗之家臣恐小
民無以自免乞令有司立法如兩宗司今後興販番舶
並有斷罪之文并畫降每歲往泉南議事指揮亦乞寢
罷況兩司知宗在任年深欲乞別選宗英往代其任故
也三月六日臣寮言近詔大宗正司選擇保明宗室二
員代西南外兩宗司見任人臣切謂兩外宗司本以訓
飭同姓使知禮義而表率今聞貪冒不止是豈置司之
本意今日南班至少昨亦盡令居內以奉朝請今雖保
明二員若專於南班則不過見在十餘人以臣管見擇
内外文臣宗室之廉正者况文臣宗室之除自有故事

所宜遵守不必拘於近例詔令三省選差文臣宗室一

次 孝宗紹興三十二年

未改元

十月十八日詔皇叔

州防禦使士恭揆用恩平郡王璩減年磨勘轉官指揮

更不施行以起居郎兼權中書舍人周必大奏南班正

任十年一轉須用實歷無回授法故也 隆興元年二

月二十七日安慶軍節度使同知大宗正事士鎮奏臣

竊見方今邊場未寧調度尚繁法行當自親近始臣契

勘生日支賜郊祀賞給最為優厚欲乞並各權行減半

書表客司宣借兵士各乞量減從之六月九日同知大

宗正事安定郡王令詔言契勘宗子宗女宗婦陳乞請

受出給料歷法令太密行移往復遲滯遂致失所合行

奏稟下項一孤遺錢米乞從本司據憑省部關牒州郡
保奏依法施行一袒免以下宗女若夫亡及休離歸宗
陳請孤遺錢米不以有無子孫特與批放一初出官人
并選人改官出給請受文歷若依元申明先關諸司審
計司驅考緣審計司於本司即非所隸應報遲緩欲乞
特免本司關會一節候本司牒到令太府寺徑行驅考
施行戶部看詳欲依本官所乞事理從之九月七日大
宗正司言依指揮條具併省吏額本司除主押官押司
官前行外於後行及正名貼司內從下各減一名從之
二年正月二十七日令詔言本司專掌屬籍自渡江
後文字散逸修纂未備乞從本司立式繳牒諸路轉運

司行下所屬州郡取索見任寄居待闕并無官宗室宗女宗婦依式供具家狀限半年類聚齎赴本司以憑編類如取索違限及供報不圓并許本司申請朝廷指揮施行從之二月一日太宗正司言太常寺報到差南班宗室太廟行事官本司置籍輪差往往稱疾請假慮至期誤事遇有請假欲從本司差以次官行事外依原降指揮宣醫如見得託疾從宣醫官徑申朝廷乞賜行遣從之 乾道五年八月十三日同知太宗正事士銖言本司諸宮院元差宿直醫官三員近降指揮減罷止差小方脉一員今乞依紹興府太宗正行司例更存留大方脉一員從之 七年十月十六日詔紹興府太宗正

行司可併歸行在大宗正司其見任并已差下官屬並
依省罷法恩平郡王璩改判西外宗正事

宋會要 外宗正司

崇寧元年蔡京申請宗室既許分居兩京輔郡乞於兩京置外宗正司擇宗室賢者管幹逐處一人仍於本州通判職官內選二人經理丞簿凡外任宗室事下干州縣者外宗正受理大觀三年罷政和二年復置中興南渡後南外置司泉州西外置司福州丞係倅魚簿係僉判兼紹興府亦有宗正司乾道七年省紹興府宗正司隸行在 紹興二年六月七日知西外宗正事士衡言西南兩外宗司相去不遠鈴束訓導事體一同有未使者理有商議望許兩司宗官每年一次往來商議職事從之 隆興元年刑部言大宗正司奏犯罪宗子雙日送

西外隻日送南外本部看詳欲依乞從之

欽定四庫全書

祖免
親祖免

宋會要款宗院

徽宗崇寧元年十一月十二日提舉講議司單臣蔡京等言近考神宗詔書條具宗室事當今可行者乞付本司立法一祖免外兩世貧無官者既不賜官又不量試故熙寧詔書惟賜田土此服屬既盡而恩有不可已者也今宗室未食祿者與夫宗女未嫁者甚衆世數既遠祿不可及乞依熙寧詔書賜田其田並於兩京近輔沿流州軍縣應未賣官田物業撥充每州府各置宗室官莊轉差文武官各一員與逐州通判同行管幹逐縣仰縣兼管仍差指使二員所收錢物並付係省倉庫收貯每歲量入為出當於三分內撥留一分以得水旱約服屬遠近每月量支俸料宗女量給嫁資仍立定則列量支婚嫁喪葬之費其逐州自今後應有沒官田產物業更不出賣並撥入官莊其管幹官并指使並增俸料若能擘畫增行量立賞典或致虧欠亦立罰格仍先於京西北路撥田一萬頃並從本司立法行下一宗室舊來在官有出入之限有不許外交之禁官門有機察之義令今屬外居僅遍都下積日滋久殆不能容出入無禁交游不節性往冒法犯禁其貧不能給者甚於齊民無資產以仰事俯育無室廬以庇風雨若不居之兩京散之近郡立關防機察之令或一有非意犯法則咎有不

可已者今請非袒免親以下兩世除北京外欲分於西京南京近輔或分
流便近居止各隨州郡大小創置屋宇仍先自西京為始每處置數宗院
差文臣一員武臣一員管幹參酌在京宮院法禁可施行者頒下應無父
母兄弟見任將軍副使以上官者許令前去若有父母兄弟而願去或無
而不願者聽從便依外官赴任立法量破舟船接人仍乞先下太宗正司
取索願出外宗室職位及家屬數目行下西京并本路轉運司踏逐係官
舍屋如無官舍即擇寬廣去市井稍遠去處相度修蓋約人數計口給屋
量數先次蓋造一宗室今既許分兩京輔郡乞於兩京置外宗正司當擇
宗室之賢者管幹逐處各置一人仍自朝廷於本州通判職官內選差二
人兼領承簿以主其事凡外住宗室事不干州縣者外宗正司受理干涉
外人即送所屬推治其宗正司官吏受乞財物凡有違犯並依外官法其
一宗約束及人從俸給並從本司參酌立法行下一今雖置學立師為量
試之法然所學未廣遽使出長入治必未能守法奉命而至廢官廢職伏
請依熙寧文武官試出官法再試經義中選者許令出官若再試不中者
止許在宮院使食其祿其試法從本司參定並從之三年九月二十九日
南京留守司言準外宗正司令宗室許於公使庫寄造酒今已到宗室三

百二十五人若男或女十歲已下者合與不合造酒詔五歲以下不造十五以下減半十月十四日宗正寺丞徐處仁言準令應脩義宗室事迹每歲九月上旬開大宗正司取索宗正司報寺即無日限又河南府應天府敦宗院宗室亦合於大宗正司取索仍乞大宗正司將應干報寺條令下外宗正司照會大宗正司言應天河南府敦宗院宗室合修墓事迹乞量立限外今宗正司回報詔限至十月十三日二十九日詔諸州縣宗室官莊祖課如人戶額計價納當月中等實價者聽五年正月十七日詔兩京近置敦宗院所以親睦宗族愛養孤幼法意甚善有司督趣不取情願致親戚睽離感傷和氣可資詳元法寬舒立文如只願居宗師即不得抑勒發遣今提舉而南京外宗正司取責兩敦宗院有無願居京師之人如有即仰依條支破並殯人般發遣上京所屬官司抑勒者以違制論今後依此大觀元年七月二十八日詔奉義郎南京敦宗院大學教授張幾轉一官以宗子釋褐教養有方故也二年八月二十二日詔保州皇族子孫於屬雖遠然未有仁而遺其親者也比聞皇族之孫未官者餘三十人或貧乏不能自存已令置敦宗院其六房內各擇家長年二十以上者與三班奉職二人一房及六人以上者加一人並添差監當差遣三年三月二

十三日詔曰比置院于別都增學于宮邸慮其無祿而教養其未命者累
年于茲宗子之在別都或輕犯法吏不能禁氏以為接師儒之官殆相傳
後而就學者寡官冗而事煩宜有裁適以法永久應兩京教宗院并官吏並
罷左院宗室令所屬限兩月依官序差人收給驛券津置赴闕無官者依
監當官例其官莊財用並令常平司拘收封樁舍屋並撥充公宇應兩京
宗室到闕許就陸親廣親宅并傍近舍屋居住每員所占依自來條例應
宗學并博士正錄員數及南班官無官宗室及第出身等推恩係格令編
修聖政祿所限十日重加詳定以聞政和二年七月八日詔曰國家承平
日久宗族蕃衍成大服屬既遠祿將有所不及而貧乏至或不能自存昨
詔有司分食兩京為五粟稍之祿申以庫序之教朕心庶幾焉日者有司
將升等者削其令給祿賜者裁其數于錢石案試而後給丁憂事故阻格
不與廢教宗罷學校流寓羣教無室廬以居失教教之意甚矣應宗室並
依大觀三年四月以前處分其教宗院屋宇可下所屬速令繕葺收收因
租吏外有餘餘祿喪葬月給量與增數丁憂事故不得住給訪聞應有官
人以員多闕少三二年不得差遣頗致墮困朕甚憫之應該出官待次半
年以上無闕注擬及停廢昏默已經一舉可各隨本資序注授一處各令

之任支與請給仍與人從之半不滿十人全破更不釐務依在任法每州不得過二人額侍次注授者自依舊法所在登科試中人並與添差八月十二日知西外宗正事士曠奏應兩京敦宗院宗子有文藝行實衆所共知者許外宗正官考察以聞量材錄用其或收邵亂衆違犯禮法者乞依太宗正司以得指揮量行庭訓從之十六日士曠又奏乞應祖免親宗女無祖父母父母大歿無子孫本官無期親以上食祿者許入敦宗院居住身分料錢外與量支錢米至再嫁比附非祖免親宗女再嫁錢數支給已上並支宗室財用詔依內再嫁許給錢一次三年正月二十三日西京外宗正司狀與勘敦宗院宗女有祖父母父母俱亡在室及聽離歸宗人見有親兄弟伯叔或親姪在敦宗院住者不肯同居便要別作一位本司今相度乞應敦宗院宗女祖父母父母俱亡見在室及聽離并夫歿歸宗者並令於在院親兄弟伯叔或親姪位同居如在院無期服以上親可以同居即令於在院服屬稍近宗室位次鄰近別給屋二間居住有姊妹者並同居從之四年六月三日南京外宗正司奏檢承勅節文西京南京復置敦宗院其合置官屬等並依大觀三年四月以前指揮施行本司今來修葺到敦宗院舍屋共一千四百二十七間依元降朝旨分僻作一十六宮

院並已了當財用司錢物已得足備到院宗子并緣嫁應用什物並以
豐足外有未到院宗子四十八位屋宇預行修葺並已足辦及勸誘宗子
已入大小學人二百一十五員今來復置敦宗院事務委是就緒詔知南
京外宗正事管勾宗室財用及懷士等各特轉官宗正丞管勾敦宗院各
減三年磨勘六年四月十九日西京外宗正司奏兩京敦宗院每緣省親
參部赴試往往到闕散處在外違犯約束者眾乞令兩京敦宗院給公據
起離除省親者在所有親處外其參部者欲權在本宮院尊長位赴試者
欲行試於本宅宗學如沿路違程不赴注籍非時出入而不經中判者即
望遣還外司或殿試一次或再入學方聽擬注或依學法先入自訟齋所
屬尊長本學長諭縱今在外違犯而不遵於來者聽具名奏勅從之八年
四月十四日詔見在兩京敦宗院宗室並依舊兩京居住如有已起離者
令大宗正司疾速遣還並依宗室法據此詔日前當有復若京師指揮今
雖未獲宣和二年八月四日詔西南京敦宗院宗室立法已備自大觀續
降銜改浸失本旨原給之厚頗踰袒免親合釐務入坐享厚祿不復注授
既違先帝辦親疏等降使之從官以成既其材之意南敦宗院有四萬
四千頃房廊二萬三千六百餘間而日怠不給為法之久殆不能守西南

教宗院自今可並依崇寧舊法應續降申明衝改凡係崇寧舊法所不載者並更不施行崇寧法於公庫寄造酒及過節管設仍並罷見在院人依崇寧法不合入院者特免改正外依大宋正司條法不應支破請給或食料者據本院見請減半給之其合釐務官到院滿一年未釐務官自合赴部日滿三年不注授者本位錢米等並住給所有財用令外宗正司管勾財用官格留逐歲令用實數以十分為率更留二分寬剩餘並令逐路諸司隨用原本款業錢物元合屬處拘收具數聽旨三年六月二十七日增置西南外教宗院教授各一員高宗建炎元年八月一日知南外宗正事趙士傑言近往淮甸措置就糧去處今來唯有揚州寬廣租可安集緣本州路當衝要又所管止有三縣素號饒乏竊恐緩急難以應辦契勘揚州與潤州對岸相去止隔一水若於潤州置司安存宗室不獨淮甸財用處足兼亦良便詔南外宗室住鎮江府西外宗室住揚州東京宗室住江寧府二年正月九日詔西外宗室令泰州高郵軍居住趙令憲差知西外宗正事主管泰州宗子趙士從添差同知西外宗正事主管高郵軍宗子三年六月六日詔宗室女宗婦散漫無依仰州縣長貳支給錢米津發赴所屬有官人發赴吏部無官人發赴西南兩京教宗院如州縣奉行減裂即

許越訴十二月二十日知南外宗正事原本缺言昨被旨許緩急將帶一行宗子官吏等從便還移州郡就請錢糧今來本司已自顧海船般載宗室等移司前去泉州就錢糧所有宗室官吏請給等乞下泉州應副從之
紹興元年九月十九日中書舍人胡文修等言嗣濮王仲湜乞權將南外宗正司裁減官吏等事今具申請畫一一南外宗正司見在泉州置司即今見受宗子一百三十二人宗女一百二十六人宗婦七十八人所生母一十三人官屬知宗令應主受財用言韓協陸機先財用司指使賀琮孫康主受財用官并指使乞並罷主受敦宗院官等郭壙李泳只乞存留一員敦宗院指使智修靖兼監親睦庫敦宗院監門官王德一員見闕只乞差一員兼檢察宗子錢米餘一員減罷兼監親睦庫係財用司指使已罷人吏宗正司六人財用司四人敦宗院二人親睦庫子二人只乞留書吏一名副書吏一名貼司一名財用司人吏並罷敦宗院留手分一名親睦庫子留一名西外宗正司即今見受宗子九十五人宗女四十九人宗婦三十人所生母二人官屬知宗士持主受財用官二員已差下張世才即今未到任一員見闕主受敦宗院胡宗懿王于濟敦宗院教授侯文仲監親睦倉庫劉昇監敦宗院門路關財用司指使曹洵張察人吏宗正司六

人教宗院二人財用司六人教宗院監門下軍典一名親睦舍亦撥司一
名庫子二人財用司兩指使下軍典各一名若將西外宗子併入南外宗
正司其西外宗正司官吏各並罷又其條上言各罷宗正司財用官其宗
室請給俸轉運司將上件錢物應副今來財用一司官吏合行減罷所有
逐月餘聚宗室錢米乞令教宗院監門官兼行除察施行監修等契勘南
外宗正司見在泉州置司其原由見受宗子等人數本處錢糧已是瞻養
不給若便將西外宗正司併為一司顯見錢糧無可應副兼所受宗子等
無處安泊所有南外宗正司乞減官吏等欲並依所乞外其西外宗正司
舊置司內奉司官吏等欲比附南外宗正司裁減官吏等事理施行從
一二年三月四日臣僚言伏覩舊制置西南外教宗院為祇道無官宗子
酌給教宗院每一口月給米一碩錢二貫有出官或隨侍者中所屬離教
宗院落籍住支伏見建炎初盛極大赦數內西南兩京無官宗子往往收
執教宗院所請祇道奏恩任所勘給顯是冒濫今欲乞行下諸路州郡若
見任人以此冒濫者並仰截日住支候任滿日中所屬勘給戶部勘當見
任差違之人自有本任合得請給其本房人口月給錢米俟緣自合夫給
從之四月二十二日兩浙轉運判官梁汝家言應宗室文恩並經由南西

丙宗正司召同宗有服人兩員保明宗正司裁責批工州縣方得勘丈戶部勘當欲下諸路州軍依已降指揮召本官尊長或無服紀宗室大使臣兩員如無大使臣即召宗室小使臣三員結除名之罪批書印紙及官告了當批工請受文憑及乞委逐州長史驗實方得執行從之閏四月二十日知南外宗正事趙全愿言教宗院許置教授一員教導宗子昨緣前宗室士博申明得旨更不差注止乾州學教授兼領與勘本司所管宗子人數多比緣兵火之後全之教導舉勘西外宗正司所管宗子全少見依舊法專置教官一員今來本司人數既多往往聽從勸率務舉向善欲望依西外宗正司見行舊法置教宗院教授一員庶幾教導宗子不致失學請給人從乞依州學教授條例施行詔依西外教宗院許置教官三年五月十二日知泉州謝家言泉州賦入素為微薄不足支用南外宗子支費尤為急闕緣本路止有提刑市舶常平司錢物各有專法不許他用其南外宗室并請受驗被旨令轉運司支撥上供銀價錢二萬貫應割自去年七月支到十一月終外自十二月至今今年終尚闕錢六萬二千四百餘貫欲乞給降詔令禮部給降福建路空名度牒二百五十道專充前項支使五年閏二月二十三日詔皇叔眉州防禦使知西外宗正司士博特與轉

正任觀察使以通判福州權西外宗正丞郭三成言士轉然滿三年任內無遺闕所總宗室並無犯徒以上罪乞送吏部勘當本部申正任刺史以工轉官並係朝廷除授特有是旨三月三日詔西外數宗院赴任宗子雖不般家屬前去如至住所在十程之內亦便行住罷本房人口錢米如在十程之外即計程限一月內般取如違限更不得支給錢米南外宗正司依此七月十七日添差通判湖州趙子偁言欲乞并諸州宗室令逐州空閑官屋如無以官地蓋造屋宇拘在一處內選差尊長一人鈐束檢察傷冒仍差監門官一員禁止出入年未及十五歲附入州小學十五歲以上入大學依學生月給錢米仍許依進士科舉法取應未出官者亦許入學聽讀實及一年方許參選庶可教養成材上副陛下敦叙之意從之六年三月二十六日南外宗正司言檢準崇寧外宗正司諸外宗正丞以本州通判簿以職官兼領又令諸丞簿取旨差契勘本司見闕宗簿一員已牒左朝請郎就差簽書平海軍節度判官廳公事朱岳權行主管本官委是協力欲望朝廷正行差注兼領從之八年三月十八日鄧州觀察使士樸言外宗正司自艱難以來選徒不常在院宗子有失師訓數年曉有定居即分大小學隨材教導其間稍有向學能文者未聞激勸之方欲乞應敦

宗院宗子在學實及二年文藝卓然衆所推譽委自教授保明宗官考實
申奏朝廷乞特免文解一次即不敢比附量試之人補授官資詔令逐司
每年各舉一名十三年十二月四日禮部言臣僚乞於逐路漕臣置司所
在各置一敦宗院而因委之提舉本部措置欲令大宗正司行下諸路轉
運司委州縣取會凡遇居宗室令州軍勘驗詣實如依條願歸兩外司實
程量給路費立限一月起發經過去處無故不得住過五日其未能歸司
者欲遵依紹興五年七月十七日指揮施行或無官舍即從本州措置權
於寺宇作宮院居住限一月遷入應出違日限並住行走給錢米所有自
東京續到之人亦乞依此仍下刑部鑄版通牒州縣施行從之十四年十
二月十九日詔知西外宗正事士懷訓導宗子率循規矩俾誠有司合格
者衆傳叙之効備見究心可特與轉行一官十六年十一月二十四日上
諭輔臣曰南外宗正司士諒將滿可與合得恩澤別選差替人宗官得人
則宗室皆脩理不得其人則綱紀廢弛遂致侵優州縣宜在謹擇之十八
年七月五日大宗正司言據南外宗正司敦宗院都尊長趙子時并宗子
等一百一十六人狀伏覲知南外宗正事泉州觀察使趙士瑋到任近及
一年克立恩威革去舊弊孤遺老幼各循義方子時等竊慮朝廷別有峻

擢使宗子等有失依賴乞候今任滿日許令再任一次詔令再任二十六年三月二十八日詔西南兩外司不限文武如有忠義孝友文行廉謹政事剛明可以立治功可以為時用薦之於朝以備顧問先是安定郡王全衿奏請故也七月二日保寧軍承宣使知西外宗正事士衍言西南兩外宗司相去不遠凡所申請及鈐束訓導宗子事體一同其間有未便於事者理合商議欲望許兩司宗官每年一次往來商議職事從之三十年九月十三日士衍又言西外教宗院都尊長文之供職十年教誘同宗留心學校前後科舉無不綴者緣本人見免文解乞將文之依本院前都尊長左之例使郊一官有以激勵從之同日詔秉義郎主管教宗院劉機成忠郎監教宗院門張深特令再任守闕進武副尉林愿留充本司點檢文字依大宗正司格法支破請給理為責任從知西外宗正事士衍乞依南外宗正司例故也孝宗紹興三十二年未改元十月十三日知南外宗正事趙子游奏檢照紹興元年九月十九日勅嗣濮王仲湜奏裁減南外宗正司官吏教內主管教宗院官二員監門官二員各留一員餘並罷隆興元年七月四日南外宗正司言達限未嫁宗女乞特與展一年如限滿未嫁依舊支錢米所有歸宗之人亦乞寬限一年出嫁庶可從容議親從之八

月十四日詔行在及紹興府宗正司教授紹興府主管財用宗丞各減一員從臣條議減吏額之請也十月二十四日刑部言大宗正司奏應宗子犯罪鑲開依已降指揮分送西南兩外宗正司今諸路州軍勘奏犯罪宗子得旨令本司展訓訖鑲開若令本處差人押赴本司却行差人管押分送兩外司亦恐往復經涉道路不便欲乞今後原奏州軍承降指揮到日徑自差人管押前去雙月送西外司隻月送南外司本部看詳欲依所乞從之乾道二年正月二十五日戶部禮部言知南外宗正事趙不猷奏諸州宗室尊長不過檢察偽冒請受至於犯法莫敢誰何欲乞將在外宗子應有罪犯並聽本州尊長量行訓治本部勘當除宗子所犯情理深重合取旨外餘欲依所乞施行從之二年十一月十七日皇弟少保靜江軍節度使判大宗正事恩平郡王璘言紹興府大宗正行司昨差宗丞一員財用一員官教二員近裁減宗丞官教各一員以本司財用兼充宗丞職事竊緣主管宗室財用係專一檢察却書應南班宗室行司官吏請給係屬本司所隸若令財用兼充宗丞職事委有妨嫌欲乞將行司宗丞職事令官教兼權從之七年四月十二日宰執進呈士輜薦令德可為宗官上曰可差知南外宗正司事虞充文奏曰行在紹興西南外置宗正司四蜀中

獨無亦是闕典上曰蜀中宗子豈無不率教者西南外兩司可移其一於蜀先文奏曰容臣等討論取旨五月四日宰執進呈宗正元置司指揮先文奏曰陛下以紹興密通行都不置宗司亦可今考元置司之由蓋紹興三年臨安未有屋宇權行分擘居住上曰紹興若無此一司宗子何所隸屬先文奏曰紹興管南班三二員令隸行在大宗正司可也上曰可移於蜀

續宋會要 玉牒

以者書大典
卷一萬九百
四十又二萬二
千八百五十六

玉牒所淳熙元年十一月十一日詔差宗正寺簿樓鐫
時暫點檢宋藩慶系錄并真宗皇帝玉牒權以檢討為
名以真宗皇帝玉牒成書闕官點檢本寺乞差官時暫
通攝故有是命。十二月十六日玉牒所上新修三祖下
上五世宗藩慶系錄真宗皇帝玉牒詔於龍圖閣安奉
詳見修書二年十一月六日宗正少卿程叔達言玉牒
修書止以實錄帝紀為則其旁見他書者未敢廣取恐
未詳盡乞下修書官屬許參考諸書修入事下國史實
錄院議本院請除會要聖政政要寶訓訓典係史館藏
書合許參照修入外其他傳記碑刻竊恐登載未實難

以照用從之。四年三月九日玉牒所上仁宗皇帝玉牒
今上皇帝玉牒官吏照例推恩。詳見修書四月六日詔
仁宗皇帝玉牒自天聖十年今上皇帝玉牒自乾道九
年以後接續修纂。七月三十日宗正寺言乞將本殿背
印親事官三人吏令皇城司選差親事官一名共作四
名充玉牒殿掌管官物庫子分番宿直從之。五年十月
八日玉牒所上三祖下第六世仙源類譜仁宗皇帝玉
牒官吏照例推恩。詳見修書十二月十五日兼修玉牒
官王希呂等言三祖下第七世以後仙源類譜并仁宗
皇帝玉牒自慶曆二年以後合接續編修之。七年四月
三日玉牒所上仁宗皇帝玉牒哲宗皇帝玉牒官吏照

例推恩詳見修睦。十二年四月十五日中書舍人兼修玉牒官王信等言玉牒殿昨承乾道八年六月內聖旨指揮專差內侍二員武臣一員專副二人專一掌管本所更不干預今來本殿去失官物若不措置差官逐時點檢竊恐仍前循習弛慢不便竊見太廟奉安所所管殿室法物等係太常寺每季輪差寺官點檢具有無損失申朝廷本所欲依太常寺體例每季差本所官一員赴殿同幹辦官點檢從之。十三年十月九日給事中兼修玉牒官王信等言本所恭修仁宗皇帝玉牒自皇祐四年至嘉祐八年已成一朝并英宗皇帝一朝玉牒及三祖下第六世宗藩慶系錄已成書未經進呈伏覲國

史院已承指揮今冬投進四朝國史列傳乞許令本所
與國史院一就同日進呈從之經於十一月二十一日
進呈推恩等詳見修書早二月九日詔玉牒所減手分
二人守門親事官二人既而以司農少卿吳煥議減冗
食下敕令所數庶幾為評事者不以舉員為念俾得以
一意職業詔依今後遇斷刑少卿全年闕官其合舉改
官員數至歲終許大理卿補舉。淳熙十六年閏五月
一日詔右丞相留正提舉編修玉牒二十四日玉牒所
言恭覲令上皇帝登寶位本所合自皇帝誕聖之後編
修玉牒申請下項一今來編修今上皇帝玉牒合書
注誕聖以後符瑞及聽讀聖德初封冠禮并納夫人及

節次加封食邑冊立皇太子至登庸位應于麻制冊文
典禮及辭免批荅等事跡欲乞朝廷劄下隨龍官屬等
逐一取降編類申所 一合要今上皇帝即位以後三
省樞密院并中書門下後省應經修進宣諭聖語時政
題記起居注照用乞從本所依年分旋於逐處闕借副
本藁草赴所抄錄照應編修 一欲從本所行下六曹
寺監等處將每遇承受應干續降聖旨指揮及改更詔
條事件等並限日下闕報赴所如有差漏乞依史館已
得指揮施行從之 十一月十六日宗正少卿耿秉等
言本所恭修到至尊壽皇聖帝玉牒係自乾道九年接
續起修至淳熙九年計一十年並已成書欲候日歷進

書日許令一就同日進呈從之

十二月三日玉牒所

言進呈至尊壽皇聖帝玉牒下項合用匣伏梵板羅紙
怕複等乞依體式令文思院製造留中及投進重華宮
本并副本係用貢餘三省紙書寫朱紅欄界乞從本所
具數報雜買務收買合用顧工雜支等錢欲依淳熙七
年例支降二千貫乞下戶部於左藏庫支供從之合進
讀第一冊上五版欲乞將來恭進重華宮日用羅本進
讀其恭進本令都大主管官承受官授重華宮提舉提
點官進入玉牒羅本欲候進呈畢迎奉回玉牒殿幄次
權行安奉以俟恭進重華宮進讀畢迎奉於玉牒殿正
行奉安依例修玉牒官進讀第一冊上五版今來見闕

修玉牒官欲乞就差以次官進讀皇帝恭進至尊壽皇
聖帝玉牒本所編類作一十二帕合製造黃羅套封預
前就委本所承受官進讀御名降下封複以俟恭進其
合用表文乞下學士院預期製造所有留中本依例至
日令本所承受官傳進依自来進書體例閤門修定儀
範合差點檢職級手分入殿起居及往回照管合用品
服欲乞從本所報文思院照應昨進呈玉牒慶系體例
制造赴所給散施行並從之。紹熙元年三月十六日
宗正少卿耿秉等言本所見編修今上皇帝玉牒會要
皇后家世三代名御并始生年月日時行第及符瑞初
封并節次加封年月日等事迹照應編修欲乞朝廷剴

下本所移文本殿提舉承受官逐一取降付所從之

八月十六日玉牒所上至尊壽皇聖帝玉牒官吏推恩

詳見修書

三年四月七日吏部侍郎兼修玉牒官羅點

等言本所接續修纂至尊壽皇聖帝玉牒係自淳熙十

年以後至十六年二月一日將以成書欲候國史日歷

所進呈聖政日許令一就同日進呈所有合行事件乞

並依紹熙元年體例施行從之十一月二日閣門言

十一月十四日垂拱殿進呈至尊壽皇聖帝玉牒聖政

會要從閣門修定禮儀節次如後其日皇帝御垂拱殿

坐候有司排備儀鸞司於殿上東壁稍南設至尊壽皇

聖帝玉牒聖政會要卓子并設拜褥訖知閣門官二員

前導簿書官二員自殿門前引玉牒聖政會要腰輿入

殿分東西壁禁衛前立定腰輿不置地玉牒聖政會要

所點檢文字以下並數隨腰輿入殿於腰輿西一行

立閤門報引玉牒聖政會要所提舉官禮儀使以下并

騎導官親王以下並執笏入殿於殿下分東西相向立

定皇帝服靴袍出宮禁衛等并玉牒聖政會要所點檢

文字以下并腰輿下人並迎駕自贊常起居內等腰輿

華官不拜止應皇帝坐知閤門官以下次第常起居

次舍人分引玉牒聖政會要所提舉官禮儀使并騎導

官親王執政官以下并進讀官及玉牒聖政會要所官

一班常起居訖玉牒聖政會要所提舉官禮儀使執政

官進讀官玉牒聖政會要所官并殿東階下面而立

官並出殿次入內官詣玉牒聖政會要腰與前

各取合進呈書匣捧升殿於殿上東壁卓子上各

置定玉牒臣在南聖政臣在中會要臣在北知閣門官

二員前導皇帝起詣褥位東向立再拜訖前導復歸御

坐次舍人撥玉牒聖政會要所提舉官禮儀使執政官

并進讀官升殿於御坐東西侍立玉牒聖政會要所

官殿下依席立俟入內官進御卓子玉牒所提舉官并

進讀玉牒官稍前立分進讀玉牒官於御前過西壁面

東立玉牒所提舉諸司官於玉牒匣前揭笏啓封開鎖

訖出笏歸侍立位玉牒所承受官揭笏於匣內取冊轉

授提舉官搢笏接訖承受官出笏提舉官捧冊置御卓
子上出笏皇帝起於御坐前立提舉諸司官承受官分
東西相向立並搢笏揭冊訖出笏進讀玉牒官搢笏稍
前取冊子指讀逐板揭冊指讀並如上儀俟進讀畢皇
帝復坐進讀玉牒官置冊于御卓子上出笏却於御
前過東壁降東階下殿東壁面西立提舉官搢笏收冊
復授承受官搢笏接訖提舉官出笏稍後立承受官捧
冊入迎訖出笏從舉諸司官搢笏歸迎訖出笏歸位立

次聖政所次會要所並如上儀入內官撤御卓子捧下殿置膝與上玉牒聖政會要所提舉官并執政官並
降東階下殿東壁面西立舍人引玉牒聖政會要所提

舉官禮儀使一班當殿立定各出班稱謝訖位立贊兩拜如御藥下殿宣答聽宣答訖兩拜舍人引赴東壁面西立次玉牒聖政會要所官一班當殿立定引班首出班稱謝訖歸位兩拜如傳旨謝恩兩拜訖不該賜茶官先退次引提舉諸司官并承受官以下一班當殿立兩拜訖並歸位立次引玉牒聖政會要所點檢文字以下一班如上儀如傳旨宣坐賜茶合赴坐官賜茶如儀候賜茶訖皇帝起還宮十一月七日御史臺閣門太常寺言十一月十四日進呈至尊壽皇聖帝玉牒聖政會要所有安奉迎奉儀注令同共修定下項前期儀鸞司同臨安府於玉牒所玉牒殿設權安奉玉牒幄次又設提

舉官等並玉牒所官及文武百官幕次於玉牒所內外
又於玉牒所門外設聖政會要幄次又於祕書省設權
安奉聖政會要幄次又於祕書省內外設提舉官等及
文武百官幕次并於垂拱殿門外設權安奉玉牒聖政
會要幄次進呈前一日絕早玉牒所國史日歷所祕書
省提舉官都大主管官承受官諸司官以下玉牒所官
國史日歷所官祕書省官各赴逐處幕次俟儀衛儀伏
樂人輦官等排立定御史臺閤門太常寺於祕書省引
國史日歷所官詣權安奉聖政幄前北向立班次禮直
官引提舉官詣幄前北向立班皆再拜提舉官升詣聖
政香案前上香降階復位立提舉官以下皆再拜訖退

歸幕次宿衛會要玉牒如上儀迎奉并進呈其日五更
騎導等官先赴祕書省幕次并合赴祕書省儀衛儀伏
輦官樂人等並排立定御史臺閣門太常寺分引率執
親王使相侍從臺諫兩省官知閣禮官國史日歷所祕
書省官南班宗室詣樞安奉聖政會要幄前北向立提
舉官以下皆再拜訖分引提舉官各升詣聖政會要香
案前上香降階復位立提舉官以下皆再拜退引提舉
官升詣幄前分東西相向立次引親王使相執政侍從
臺諫兩省官知閣禮官國史日歷所祕書省官南班宗
室以次出分左右乘馬騎導次輦官捧擎聖政會要腰
與進行儀衛儀伏樂人作樂前引次引提舉官乘馬騎

從至玉牒所門外聖政會要腰輿權入幄次其玉牒所
行禮並如上儀訖次引騎導官並分左右來馬騎導
次玉牒腰輿進行次聖政會要腰輿進行儀衛儀伏樂
人作樂前引次引提舉官並乘馬騎從入和寧門至合
下馬處導從官執笏步導步從至垂拱殿門外幄次儀
衛儀伏樂人等各於幄前排立以俟垂拱殿進呈畢出
殿門親王使相執政使從臺諫兩省官知閣禮官玉牒
所國史日歷所秘書省南班宗室合騎導官分左右執
笏步導羣官捧笏玉牒聖政會要腰輿進行儀衛儀伏
樂人作樂前引提官執笏步從至合上馬處上馬騎導
出和寧門至玉牒所提舉玉牒官并玉牒所官並

下馬執笏導從玉牒內提舉會要官並因史日歷所祕
書省及應導從官並以次騎導騎從聖政會要赴秘書

省詣玉牒殿幄次權安奉訖俟儀衛儀伏樂人鞞官
等排立定提舉官并本所官詣玉牒殿下北向立提舉
官升詣香案前上香復立提舉官以下皆再拜訖班退
俟聖政會要將至秘書省門文武百官于門內立班內
文臣聲稱通直即以上見任寺監主簿丞務郎已上職

事官武臣修武即以上官

迎拜導從官至秘書省門並

下馬執笏導從詣祕閣下幄次權安奉訖權退

日恭進

至尊壽皇聖帝聖政會要本所官迎奉詣右文殿幄次

內權安奉

儀衛儀伏樂人鞞官等排立定御史臺閣門

大堂寺分引親王使相執政侍從臺諫兩省官知閤門
禮官國史日歷所祕書省官南班宗室詣閤下北向立
次禮直官引提舉會要官詣閤下北向立詣聖政香案
前上香次詣會要香案前上香復位立在位官皆再拜
訖華官捧擎聖政會要知閤禮官導引升閤權安奉側
座俟安奉時將至引文武百官詣閤下北向立提舉會
要官詣閤下香案之東西向立俟報時及祕閣正安奉
聖政會要畢提舉會要官降階北向立在位官皆再拜
提舉會要官詣聖政香案前上香次詣會要香案前上
香降階復位立在位官皆再拜訖班退安奉至尊壽皇
聖帝玉牒其日俟恭進重華宮訖內侍官捧玉牒置於

腰輿革官捧等腰輿以次出御史臺閣門太常寺分引親王使相執政侍從臺諫兩省官知閣禮官玉牒所官南班宗室詣重華殿門外左右執笏步導儀衛儀仗樂人作樂前引提舉官執笏步從出重華宮門外並上馬騎導騎從將至玉牒所門文武百官於殿門外立班內文臣簪帽通直都司已上見任寺監主簿承務郎已上職

事官武臣修武郎已上

迎拜導從官至玉牒所並下馬

執笏導從至玉牒殿下稍南北向立禮直官引提舉官詣幄前西向立俟等玉牒升殿入幄權安奉側座安奉時將至文武百官詣殿下北向立提舉官詣幄前西向立俟報時及正安奉玉牒畢提舉官降階北向立在官

皆再再拜提舉官升詣香案前上香降階復位立
在位官皆再拜訖班退三年十一月二十三日玉牒所上至
尊壽皇聖帝玉牒官吏照紹熙元年體例減半推恩

慶元三年二月五日進呈神宗皇帝玉牒八十卷

詳見

修書下

六年二月二十二日進呈聖安壽仁太上皇帝

玉牒四十卷

詳見修書下

嘉泰三年三月二十五日玉

牒所言進呈徽宗皇帝玉牒依例提舉官禮儀使詣所
觀書今采參知政事許及之參知政事袁說友並曾秉
本所修玉牒官欲乞一就請詣觀書從之四月十七
日上徽宗皇帝玉牒一百二十卷

詳見修書下

四年八

月九日上今上皇帝玉牒五十卷

詳見修書下

開禧元

年正月二十五日玉牒所言玉牒殿安奉祖宗玉牒官
物浩瀚全藉軍兵晝夜巡警防護近雖差撥到看管軍
兵盡皆瘡老昏耄如遇不測風燭難以倚伏今來除殿
前司已承指揮差到一百二人不問遠近風燭依前赴
所守護外今措置日後如遇比近去處不測風燭今本
司更行別差軍兵二百人準備般挈防護役使從之
四月十一日宗正寺主簿常褚奏臣聞古者史氏大事
書之於策今之玉牒是也竊觀先朝修進玉牒必以后
德始末附載卷後所以重天合章母道並天地垂不朽
也恭惟憲聖慈烈皇后厚德承乾皇明儼日密輔烈祖
大業中興助決睿謨長子主器參定文命克授神孫陞

下嗣興實賴擁立儀刑四世揖遜三朝功烈巍巍卓冠
前古固宜大書特書不一書比隆烈祖昭示萬世粵自
紹興丁丑因進高宗玉牒僅紀世系與夫正位中闈之
事而已自後歷年事實未有登載誠為闕典且丁丑所
進盡紹興二年以前書也乃書憲聖紹事十三年事先
期附載似非紀事之體緣已經進難以改移欲乞明詔
玉牒所自下詳稽后德亟加述纂併移前所附載於成
書之後庶幾先後有序以備思陵一朝玉牒之藏抑顯
我國家母后仁聖之盛從之互見修書下閏八月二十
四日上欽宗皇帝玉牒二十冊憲聖慈烈皇后聖德事
迹一十冊詳見修書下嘉定四年十月一日禮部尚書

卷二萬二千八百五十六

兼修玉牒官章穎等言備數玉牒脩纂供職以來略閱數十年間已進之書及日下將進之草其體制容有未定所書凡例亦多乖謬蓋玉牒專書一代大事視昔遷固實為帝紀而元降格目內分十條若盡用遷固帝紀之體誠為太簡然而職以文士徵之聖聰金牋寶匣藏於祕殿若止一切沿襲案牘之詞如書軍人口累重大錢如書宗子濟夫為患行孝救母等語登之簡冊似不雅馴穎等所謂體制之未定者此也至於每年之事有當書而不書者如嘉泰元年三月二十八日之火此大災也而不書雪寒陰雨放房地錢此細事也而累書之若此之類不勝其多則書不書未有定例也科舉之詔

三歲一下而或書或不書金國使命每歲三遣而或併書以名或分書而及其官若此之類不勝其多則所書之法未有定例也所謂凡之率牒者此也今欲得稍變案牘鄙俚之語使之成文可讀可傳定為玉牒之體制仍欲開具其事為當書其事為不當書即於逐事著成教語仍編成一冊定為玉牒之凡例如此則自此以往上下官吏遵為成式先後編集不至異同至有非常之事即俾修纂之人自立言辭鋪叙本末隨事刪潤以為成書庶幾寶藏傳之萬世不負聖朝任使之意乞明降指揮以憑修定從之六年二月二十五日禮部侍郎兼中書舍人兼修玉牒官范之柔等言本所昨承指揮編

修宣祖皇帝以後宗派除已於淳熙五年進呈第六世
仙源類譜外所有第七世仙源類譜已及三十餘年未
經進呈今來編脩並已成書并今上皇帝玉牒除自誕
聖即位至慶元六年已行修進外今續自嘉泰元年修
至開禧元年計五年亦已成書伏覩近承指揮刊正玉
牒辨誣之書繕寫附進欲乞許令本所進呈從之

此二條單
汪大興奏
一萬九百四
十

補舉。紹興二十年二月九日知臨安府宋祝相度欲
將舊車輅院地步改造玉牒所及宗正寺從之以玉牒
所檢討官王儼有請也。二十六年十月二十三日玉
牒所言本所編言修祖宗并今上皇帝玉牒將來進呈
畢依舊制合於玉牒殿安奉今來若別創建用工不少
欲就本所見今聽堂地及牆外空地令漕司改相度
改建從之

宋會要

修玉牒官

修玉牒官掌帝籍玉牒及皇族親屬昭穆之序唐本宗正之職開成後始
別置修玉牒官以上國朝會要紹興十二年蔡元好述以率臣一人提
舉修玉牒官一人以待從魚凡宗正卿少而下悉與修纂公案有五鼓吏
一十人以上中興會要太宗至道初詔刑部郎中張洵與駕部郎中史館
修撰梁周翰同編皇屬籍本成張洵卒止周翰領其事真宗咸平初詔于
宗正寺建屬籍院又詔修玉牒周翰又奏宗正卿趙安易知制誥梁周翰上
于秘閣廳編纂之四年正月修玉牒官宗正卿趙安易知制誥梁周翰上
新修皇屬籍三十三卷詔宗正寺仍令提續編纂凡白牒書以銅金花白
羅紙全相簡金紅羅帶黑漆金鈿匣紅錦囊金鏤幅屬籍諸王書以
銅金白紙紙銀鈿匣紅錦標帶紅羅腹黑漆銀鈿匣錦囊銀鏤公侯
以下白紙紙牙和餘如諸王大中祥符六年正月刊宗正寺趙世長趙可
封言有唐修玉牒官李衡等奏以聖唐玉牒與史冊並載乞于玉牒之上
特創嘉名再詔以皇唐玉牒為名今乞于皇屬籍之上刊崇懿號詔以皇
宋玉牒為名又今屬籍別錄一本送秘閣收藏用緗檢計五月趙世長又
請降御製聖祖降臨記付雷奇秘于玉牒樣從之六月十一日中書門下

言宗正寺奏准制冊德妃為皇后合編入屬籍者伏以位正六宮母儀萬
國作配之礼既展于國家氏之源必登于主籍請依宗正寺所請降下
從之 八年詔建玉牒殿屬籍堂于新寺命宗正卿趙安仁重脩玉牒屬
籍安仁又上仙源積慶圖詔成寫一本藏龍圖閣十二月兼宗正卿趙安
仁言宗正寺每年編脩玉牒自親王已下只會開逢合監宮使臣及管勾
南陔北宅所供到科違官封爵秩多不同格式自今並令中書樞密院具
錄舊衙及加恩新命下寺從之 九年三月趙安仁言按唐故事祖宗
玉牒皆首載混元皇帝今乞以御製聖祖降臨記冠于列聖玉牒及別脩
皇朝所請如唐天寶源流譜可乞別製大名又請以知制誥劉錫夏誅為
宗正寺修玉牒官並從之自後得置脩玉牒官一員或二員大禧元年二
月趙安仁言宗正寺所掌宗廟祠祭及編脩玉牒屬籍並未有經書文籍
檢閱故定除通典會要及前代親屬圖牒文字欲將本寺公用錢寫置外
其國子監印本書籍乞及賜一本從之二年二月兼宗正卿趙安仁言臣
修玉牒望詔史館按所借國史紀傳付臣抄錄即封還史館詔安仁與范
迺執史館按合要事日抄錄其宗以國史當從藏安仁洎迺元修史官
故從之仁宗天聖三年正月宗正寺言制命政中書令郭崇岳女立為皇

后合修皇帝玉牒所以皇后事迹依例編修從之崇祐元年五月十九日
制詔宗正寺修玉牒官李淑言檢會前修玉牒官馮元亦是兼編脩會要
蓋緣國史土牒事即同無異會所以只就編修院修纂其合修玉牒官趙
良規亦是就長商量文字今依例施行外欲以編修院聽西閣子充修
纂之所趙良規如入院日望令給與及茶湯供應從之寶元二年十月六
日翰林侍讀學士李淑言奉敕修宗正寺玉牒官籍今先次修纂成皇帝
玉牒二卷皇子籍一卷具于畢進呈并撰獻太子名先祐成平中亮今錄
玉牒修纂欲自以後以高祐字從之原定元年五月九日宗正寺修玉牒
所言列聖玉牒欲今後一年一次貼修十年一次先換及奉本一十二卷
合送宗正寺本殿奉安冊本一十二冊欲留中脩聖覽從之至和元年十
一月詔宗正寺改事處籍十年一修今雖及八年而宗正寺其增修之
以上國朝會要神宗熙寧元年十一月四日玉牒所上仁宗皇帝玉牒四
卷英宗皇帝玉牒四卷三年六月詔玉牒所于濟三莊院置局從後編修
院十八日宗正寺言每歲正月一日裝寫仙源積慶圖宗室度牒錄各一
本供送龍圖閣天章閣寶文閣祖宗祖光親更不賜名授官一依外官之
法合與不合修入圖冊詔送太常禮院詳定祀官言聖王之于其族上親

下擬而辨于六世所以明親疎之異也親道雖盡猶且記其源流可世不
紊所以著世系之同也親疎異則恩禮不得不異世系同則恩禮不得不
同二者並行而不相悖親親之義備矣禮四世總服服之窮也五世祖免
故同姓也六世親屬矣庶姓別于上而戚串于下婚姻不通周道然也鄭康成注繫之
姓而弗別綴之以食而弗殊百世而婚姻不通周道然也鄭康成注繫之
弗別謂若今宗室屬籍五世後漢宗正歲上名籍與禮經合又戶令皇宗祖
廟雖毀其子孫皆于宗正寺附籍自外悉依百姓惟每年經戶口懷送宗
正寺此則戶令之文又與古制合也以此言之遠近之恩固宜有差降而
諸牒之記不可以不存況朝廷釐改皇族校官之制而袒免外親既宗繫
爵連國軒遞遷官祿俸事優異悉不與外官匹庶同法是則屬雖疎而
恩禮不絕若國籍埋沒則無以審其所從而為遠久之證所有祖宗非袒
免親乞依舊修寫入仙源譜虔國宗藩度儲錄其在外者委宗正寺逐年
取索附籍從之哲宗元祐元年十月二十五日尚書省言承襲郎宗正寺
丞王罕奏宗正寺條例皇帝玉牒十年一進修玉牒官並以學士典領玉
牒自熙寧中翰林學士范鎮等一進之後神宗玉牒至今未修仙源類譜
自翰林學士張方平慶曆年書之後僅五十年並無成書自奉行官制分

建宗正寺官又復累年未果決其神宗朝已上文字臣近已進呈奉安畢
今合修纂皇帝玉牒類譜寺臣以十年進書之期尚遠恐寺官因循曠時
復成曠墜請別立法宗正寺修纂寺書其玉牒官每二年一具草繳進其
會同未足不得過進兩季類譜寺亦二年一具草候及十年類聚修纂成
書進呈奉安如故事臣幾因朝大典永無廢墜從之二年五月二十五日
宗正寺言被旨修纂漢安懿王以下屬籍故例以宣祖皇帝之子為奉貢
次即以宗從高下為之序今若以濮王為奉貢則先後不倫請以度庶以
前堯卒室為籍與今所修屬籍相照通計奉第應籍已進者更不重進
止于目錄逐卷增注舊籍二字及將舊籍卷目改照與先籍通計其數庶
有所分別及不奈昭穆次序將來接續更修並請依此從之元符二年正
月二十六日宗正寺丞陳覺民言已將先帝玉牒內聖政今奉寺修玉牒
官抄寫封送國史院從之徽宗崇寧三年十月三十日命刑部尚書管師
仁重修神宗皇帝玉牒及看詳舊宗皇帝玉牒大觀二年八月一日礼部
狀太常寺中奉安玉牒跪奉殿令奉酌礼例至日差大臣一員赴寺告遷
奉安燒香稱礼儀使差進上内侍一員充都大管勾紹礼儀使一員差太
師左僕射魚門下侍郎蔡京都大管勾一員差延福宮使建雄軍節度觀

察留後知內侍有管勾太廟黃經臣政和二年二月八日詔神宗皇帝玉牒局官吏可依下項提舉官何執中與男志同轉一官蔡京轉一官四校有官有服親修纂官鄭久中蔡薏各轉一官內鄭久中許回校有官有服親人史照檢大字指書等有官人各轉一官有資人各轉一資無資可轉人及有違礙比類支賜不經進書減半選人依條施行五年三月二十九日太師魯國公提舉修史蔡京等奏重修到哲宗皇帝玉牒已具進納乞降付本院依神宗皇帝玉牒例于宗正寺取舊玉牒並臣別書寫封進請前訖擇日起引于玉牒殿奉安詔依所奏九月十二日奉安玉牒八年九月二十日太僕卿閻丘籲奏祖宗已未舊衍盛大玉牒簿止是二十一秩不能盡載今以宣祖後太祖太宗魏王分三祖編纂立政和六年太祖下九十九秩太宗下二百六十九秩魏王下一百四十八秩乞付宗正寺從之以上皆國朝會要高宗紹興十一年十月十三日宗正寺丞鄧大受奏嘗請求宗正寺舊掌之書其目有四曰皇帝玉牒曰仙源積慶圖曰宗藩慶系錄曰宗族屬籍項因建炎南渡寺官失職悉舉四書于江浙而逸之今重修舉書成賜名仙源慶系屬籍總要合國錄屬籍三者而一之因無愧于昔矣獨玉牒一書未經修舉宜下民間立賞搜尋所遺逸之書俾

先朝秘冊復獲崇奉仍詔有司討論舊制修纂陛下踐作玉牒以正九族
以壯本支備中興之盛典立萬世之宏規從之十一月二日宗正少卿江
公亮等言臣等聖旨指揮下有司討論舊制修纂皇帝玉牒欲望朝廷明
降指揮下典禮有司討論施行詔令又却宗正寺同共討論中而書有十
二年五月九日更部條具下項一本所合用印記欲乞就用宗正寺印記
行使一本所係修纂今上皇帝玉牒事體至重所有行移文字欲係三省
樞密院用狀申外餘並用牒如走干取索整會乞依勅令所押貼子及替
換取于人赴所整會文字應報官司並限日下回報一在京玉牒所係就
宗正寺置局今屋宇窄隘欲乞令臨安府就本寺添展僻處或別行踏選
一祖宗以來編修皇帝玉牒並置官屬原就差宗正寺官外亦有選差侍
從員領一今踏選到玉牒所舊人王亨一名係是收和制曾經修書之人
見係寄理承節郎新差溫台州海內巡檢見在臨安府衙關欲乞時暫差
本人權充本所點檢文字所有合破請給乞依宗正寺舊長見請給則例
支破外仍乞每月添破特支錢二十百文並于本寺大厯內批勘候本官
關到日發遣前去之任一在京玉牒所人更係就差宗正寺人更乞依舊
例一今來編修皇帝玉牒緣本寺止有少卿丞簿郎今共三角為額係祖

宗故事合從朝廷選差官施行一乞差三省人充供檢等文字依見今史館定錄院體例施行一乞中乞先次詳差本寺人吏外更乞就所報曹都量差當行人職級身分四五人相兼祇應一乞差庫殿官一員充本所承受官請降皇帝聖旨後來授官冠札出閣出官節次轉官除拜差遣并呈后生年月日納大人年月日封冊皇后制誥并皇子賜名授官冠札出閣出官節次轉官及呈女年月日下降年月日事違并主管進呈玉牒轉辦奉安一行事務一乞差通引官專一投下取會諸官司等文字今欲招收三兩人所有身分請給并乞依見今敕令所通引官體例施行從之十一年十二月二十六日詔奉旨奉檄提舉編修玉牒所就差宗正少卿丞簿三員為額同修書官編修玉牒文字始開局也十二年六月四日試起居舍人魚允修玉牒官楊德等言契勘玉牒所見遵依聖旨指揮編修今上皇帝玉牒所有合書注皇族宗枝昭穆數內所有宗正寺取會到事違全未圓備及恐後來別有轉官生亡理宜別行取會欲乞從本所王式下大宗正司及西南兩京外宗正司及主管親賢宅并吳王孟王府應所管宗室並日下依式疾速取索并造路轉運司下諸州軍及管下縣鎮將應見任寄居待闕宗室並仰依此施行仍令逐處各勸曉妻無偽冒差漏不

寔係明回報行在官司兩外宗正司限五日轉運司限半月若當行官吏
不照檢回滯去處及供報不依式涵落不圓然乞將當職官申取朝廷指
揮施行其人吏逐所屬杖一百科罪所責有以考實從之七月十二日試
起居舍人魚光修玉牒官楊愿等劄子勸會玉牒所事干國體取為机密
今據準御竄今涵泄玉牒宗枝並依準法無本所依史館例諸處投下文
字及納貼于整會事即人並于所門外計會把門人轉入係整會文字如
叶叶聽入輒入者流三千里凡所見聞因而漏泄並當軍令欲乞朝廷依
史館例給降黃榜一道付本所張掛約束施行從之二十六年八月二日
詔玉牒所點檢文字候呂澣滿日依舊例差宗正寺齊長吳旌充填今後
過關依此齊長吳旌狀本所開局之初依已降指揮差玉牒所舊人王亨
元係宗正寺齊長充點檢文字因奉人自陳辭罷請承紹興十四年五月
三日指揮正差宗正寺齊長劉洸充點檢文字本人身改本所節次差過
本寺齊長徐士明原昇承權方欲申明朝廷正行差填間逐人並皆月改
有進義校尉謝彥文言滋陳乞一時創行差充點檢文字作二年一次召
開改有是命閏十月二十七日玉牒所言契勘本所已建造玉牒殿并殿
門外祖宗屬籍堂合用金書牌額乞以玉牒之殿玉牒殿門各四字為名

其屬籍堂乞以祖宗屬籍之堂六字為名依在京例合請降御書乞委司
奉所都大諸司并承受官取降製造施行從之二十七年三月十八日詔
中興聖統移就玉牒殿奉安先是未建玉牒所權于景靈宮天興殿奉安
至是宰臣有請徙之四月十五日詔仙源積慶圖加修纂以舊到三年一
進也二十九年閏六月八日詔玉牒所通局給札指書添支等錢並罷
從史官等凡中等請也八月二十三日詔玉牒所併入宗正寺更不置修
玉牒官檢討官以本寺少卿及丞同局編修事本寺主簿更不干預見今
玉牒所手分存留兩名外餘司封差到人及玉牒所額外吏人三省樞密
院堂後官並供檢討點檢主管文字之類並罷以給舍臺諫議減冗費也
全日詔玉牒所宰臣提舉依舊修書官一員同宗正卿並修纂更不置檢
討官三十年十一月二十九日詔宗正寺胥長玉牒所點檢文字吳璉年
滿依例時暫存留祇應不妨以次人承替候將來進書安奉畢日罷從本
所請也以上中興會要紹興三十二年 五年己卯位未改元六月二十一
日詔尚書左僕射陳康伯提舉編修玉牒八月八日玉牒所官恭遇今上
皇帝登寶位本所合白皇帝誕聖之後編修玉牒正宴百司開報祇受指
揮詔應修纂近來六曹寺監寺處每遇承受續降指揮及改更詔條並限

日下開報赴所月終各簡本處承聖旨簿赴所點對如有隱漏乞將當
行人申取朝廷指揮施行從之隆興元年正月十一日中書舍人兼修玉
牒官唐文若宗正少卿何備丞徐人傑言奉所見編修今上皇帝玉牒附
修皇后事迹合要安穆皇后始生年月日時行第及應干德行祥瑞三代
名銜鄉貫納夫人初封節次加封并降生皇子皇女各人生年月日時及
進舟皇后崩年月日追上諡号祔廟等照用編脩乞降指揮下奉所移文
取會詔從之二年六月二十六日宗正少卿胡旌丞林邵言玉牒所宗正
寺恭遇今上皇帝登極并三皇子大王授封冊事體至重並合于祖宗仙
澤積慶圖內修注並太祖下伯師字行太宗下善汝事行魏王下考夫字
行昭穆世系妄寔番衍亦合按譜修入候書成繕寫圖本進呈從之閏十
一月十六日記玉牒所提舉官左僕射陳康伯將來過所為拜跪有妨時
免朝拜乾道二年正月二十四日詔尚書右僕射湯思退提領編修玉牒
思退以久名舉辭免改改為提領三年三月二十日權工部侍郎兼修玉
牒官薛良朋宗正少卿胡沂丞劉大辨主簿劉季業言奉所編修三祖下
仙源積慶圖舊例三年一次進呈昨自紹興二十八年進呈之後至今九
年今來奉所再自宣祖皇帝恭修至今上皇帝洎皇太子皇子皇孫世裔

三祖下共一十八大勅得旨許與真宗皇帝玉牒同太上皇帝聖政擇日
進呈今奉聖政已進呈訖更真宗皇帝玉牒已用銷金紙修寫梵版裝背
訖又恭修到太宗皇帝一朝玉牒成書欲乞敷奏一就擇日進呈從之四
月二十六日開門狀依已降指揮修定五月六日進呈三祖下仙源積慶
圖太宗皇帝玉牒真宗皇帝玉牒世宗皇帝寶訓節次開門修具進御如
二年閏九月二十九日進三朝帝紀之儀內皇太子并提舉官礼仪使親
王執政起居訖皇太子先退與二年不同五月二十四日修玉牒官薛良
朋等言本所見修纂光堯壽聖太上皇帝并今上皇帝玉牒及類譜等文
字外合依元降指揮按續修纂仁宗皇帝一朝并真宗皇帝十年已後一
朝玉牒欲乞依自來體例開局修纂從之六月十四日玉牒所言已進呈
三祖下仙源積慶圖太宗皇帝真宗皇帝玉牒了畢其修書官吏各該
推恩得旨依乾道二年十月二十一日已裁減進書推恩體例今奉酌擬
定修書官吏各料一官更減一年磨勘及經修不經進見在供職官並各
與轉一官在外官減二年磨勘兩該賞人止從一處推恩餘人等第更賜
從之五年十二月九日吏部侍郎兼修玉牒官陳彌作宗正少卿胡襄丞
陸之望主簿林同言本所依已降指揮供修到光堯壽聖太上皇帝玉牒

係自紹興三年接續起修至紹興十二年壬戌書完緣本所昨自紹興
二十七年首進之後今已及一十二年未再進欲望敷奏許今進呈從
之二十三日修玉牒官陳彌作等言昨進呈安奉先亮壽聖太上皇帝玉
牒係自誕聖修玉牒興二年並用銷金白羅紙書寫金線銀梵板裝背今
來進呈先亮壽聖太上皇帝十年玉牒今依樣製造從之七年五月四日
玉牒所狀依指揮條具併有吏額見管人吏一十人并通引官二人今減
罷照檢文字一人并通引官二人以一十人為額其逐人欲乞擇候進呈
先亮壽聖太上皇帝玉牒畢日罷詔依各從下裁減將來見闕日依名次
撥填六月詔以八月御殿進呈四朝會安先亮壽聖太上皇帝玉牒儀注
見口朝會安社書有門九月詔玉牒所上先亮壽聖太上皇帝玉牒修書
官吏各時一官減磨勘一年餘人等第轉官減磨勘吏賜有差十一月十
七日詔自今後玉牒所犬祭生依秘書省條法指揮七年三月八日詔玉
牒所子主管文字內從下減一人却從上存留通引官一人其減罷人候
有闕日依舊撥填以今所通引官訴六年四月裁減指揮處底故有是命
八年六月十六日詔玉牒所玉牒殿主管香火官差內侍三員武臣一員
並改作詳辦玉牒所玉牒殿總差內侍高品玉牒所主管諸司高思聰入

內侍有內侍殿頭張詠幹辦玉牒所玉牒殿恩聰等今恭酌碑具合行
事件下項一乞以玉牒所玉牒殿為名所有行移合用印記乞下文恩聰
鑄造以幹辦玉牒所印六字為文一玉牒殿內見今奉祖宗玉牒并仁
源積慶圖應干官物乞今本所見管人逐一抄別交割付恩聰等差人專
一掌管每遇旦望等乞今恩聰等燒香朝拜開殿照檢官物事畢令本殿
幹辦官一兩在名封錄并掌管起給一玉牒殿內應干官物自來未嘗專
一差人掌管今來創行幹辦欲乞差專司二人內專知官一名從于校尉
尉內潛選報所屬差取三年為界滿日發遣後遇開依此內別知一名乞
就差玉牒所諸司手分相兼如無有月人止專充專知官却差日月人
更一名充代副知祇應一欵乞全差到武臣每日專輪一司在所需直所
有直舍乞就用諸司官直舍移文兩浙運司差人赴所計置祇一恩聰
等昨來充玉牒殿香火官獲旨今奉處支月給錢一十五貫緣今所別無
所管官錢今欲乞于見請歷內按月依數幫給所差專司或日身人吏別
無主定請給乞依玉牒所諸司手分見批勘則例支取內相兼祇應手分
委是職事重疊乞添支錢五貫今本所支給所有行移紙札乞依見今玉
牒所諸司例今報司稽支供一所有合用官印後送文字欲乞今皇城司

乞據親事官三人祇應並年替過聞報本所差填所有逐人合帶官門號
乞于皇城司支請一契勘本所見今差破庫子儀萬司翰林司潛大軍兵
致乞並令分番值宿一本所見管本殿官物等乞今後令本所守門親事
官將出入之人並行搜檢從之九年四月二十四日權禮部尚書兼修玉
牒官胡沂等言本所見恭修先亮壽聖憲天體道太上皇帝一朝玉牒并
今上皇帝上牒自誕聖後起修已及五年自未並用鍍金銀兒版銷金羅
紙匣袱等乞下文思院製辦從之○七月十五日修玉牒官胡沂等言本所
見修玉牒今已恭修先亮壽聖憲天體道太上皇帝一朝成書今上皇帝
自誕聖即位起修迄已得百製達羅紙等見上經寫就乞取旨擇日進呈
從之八月二十五日詔玉牒所進呈先亮壽聖憲天體道太上皇帝今上
皇帝玉牒用九月六日進書札儀並依乾道六年已得指揮二十八日臣
僚別子橫照元豐五年進書推贊惟是願官各遠一官其餘檢討橫詳官
及一年已上者減磨勘三年未滿一年者減磨勘二年離局者遞減一等
奉酌前後此為中制今次玉牒會要書成所有合推贊典比之異時事體
稍重故乞除提舉官合得恩數外餘官更乞從有司考其供職先後月日
及一年以上者與轉一官未及一年者減三年磨勘稍重從之川庶知

名器之重從之。九月二十三日。品已修進會。要玉牒。傳光堯壽聖。遂天體
道太上皇帝。甲與盛典。可將依下項。推恩修書官。各特與轉行一官。內選
人與改入官。經修不經進官。并內侍官。各特與減三年磨勘。內選人。以類
施行。都大提舉諸司。并承受主管諸司官。各特與轉行一官。礙止。法人依
條回授。本所照檢文字。檢書等。各特與轉行一官。願換支賜者。依例施行。
三省史。礼房提點。照檢都錄事。至舊令史。守當官。守關。各特與減二年磨
勘。內守當官。守關。減半。照檢諸駁印房。依條施行。願換支賜者。依例施行。
天文官。特與減二年磨勘。提舉諸司。承受諸司。下人吏。各特與減一年磨
勘。守門親事官。庫子。兵級等。各特與揚放一次。經修不經進。使臣人吏。特
與減放減三分之一。應該令。承轉官。減年內。未有官。未有名。日及未合收
使人。並候有官。有名。日。依今來。指揮。特作轉官。清減年數。日。收便磨勘。
年限不同。人。依四年法。比折。內減年。礙止。法人。願依條。回授者。聽。十月四
日。修玉牒官。胡沂言。本作恭修真宗皇帝玉牒。已進呈。自誕聖至景德
四年。并今來。修進。今工皇帝玉牒。自誕聖至乾道三年。已行安奉。了畢。見
修纂真宗皇帝玉牒外。所有今上皇帝玉牒。亦合自乾道四年以後。再行
接續修纂。欲依自来。體例。開局施行。從之。十一月八日。礼部。尚書。兼修玉

牒官胡沂等言本所依已降指揮據續修纂真宗皇帝玉牒今上皇帝玉
牒係自乾道四年起修近奉官司應報節畧乞別下六曹問報應于合屬
去處依應回申仍月終齋承受聖旨簿並所照對其四慢及所報差漏去
處即乞依紹興元年四月指揮施行從之

以上乾道會要

宋會要

光祿寺

光祿寺元豐以後

太官令法酒庫

內酒坊

御厨

大官物料庫

翰林司

牛羊司

牛羊供應所

乳

酪院

油醋庫

外物料庫併此入門餘見諸司庫務

掌供祠祭酒醴果實脯醢醢蕝薪炭及點饌進胙以

朝官一員判寺

兩朝國史志古者其屬有大官珍羞

良醢掌醢四局令分隸御厨法酒庫古者祭祀百神則

省牲鑊濯漚三公攝祭為終獻令並以他官攝本寺但

掌供祠祭酒祭醴果實脯醢醢蕝薪炭及點饌進胙之

事府史四人駢使官二人供官一十五人元豐改制具

載職官志

太祖開寶六年十二月詔祠祭禮料香藥

等委諸司官躬親檢點置庫封掌祠日交付使臣不得
令職掌將置本舍 真宗景德二年十一月詔宗廟祭
饗神食禮料令光祿寺編牒諸司須嚴潔揀選上好物
供應其神食於御厨選差饌造委本寺點檢 太中祥
符元年三月詔光祿寺祠祭家事令逐處於神厨泥飾
編整不得逐旋般赴其齋宮神厨置鑰收掌 二年二
月詔步軍司餘剩員軍士_三五人看管公宇禮昇禮料凡
祭祀果子料物於諸庫務請領其剩寺官不得寄家於
寺宇內 三年五月詔光祿寺應祠祀合用脯醢瓜蔬
豆醬逐旋於御厨請領 四年正月內出銀沙羅十五
枚付光祿寺置庫收掌備天地宗廟奠酒之用 十月

詔光祿寺廨所藏祠祭禮料法物令置庫收貯務要嚴
潔 神宗正史職官志光祿寺卿從四品少卿正六品
丞正八品主簿從八品太官令正九品各一人太官令
掌供膳主簿掌鈞考簿書凡供進之物頒其禁令而檢
察之祭祀牲牢酒齊黓鬯及榛栗脯修魚鹽菱茨之名
數率前期戒有司辦具若奉牲告充告備及賞牲饗濯
漑取明水明火割牲實樽彝豆簋簠皆太官令白卿
以時莅其事朝會宴享則察視而糾其闕失應給賜酒
食多寡以式分案五設吏十總局八 哲宗正史職官
志總局十內有大官令掌膳羞割烹之事凡供進膳羞
則辨其名物視饌食之宜而謹其水火之齊祭祀則供

明水火取毛血牲體以為鼎俎之實朝會宴享則供其酒饌凡給賜視其品秩以為之等元祐元年罷二年復置又有太官物料庫掌預備饌食薦羞之物以供太官之用辨其名數而會其出入造法酒以待進御祠祭給賜則歸法酒庫哲宗正史職官志云掌以武法授酒材視其厚薄之齊而謹其出納之政凡祭祀供五齊三酒以寔罇罍造常酒以待餘用則歸內酒坊哲宗正史職官志同供饌羞及內外饗餼則歸御廚哲宗正史職官志不載御廚供酒及茶果寔則歸翰林司哲宗正史職官志同繫飼牛羊則歸牛羊司哲宗正史職官志云牛羊司牛羊供應所掌供大中小祀之牲羞及太官宴饗

膳羞之用供造酥酪則歸乳酪院哲宗正史職官志同

供造油鹽載則歸油醋庫哲宗正史職官志同頒給油

鹽米麵則歸外物料庫哲宗正史職官志云掌收儲米

鹽雜物以待膳食之須凡百司頒給者取其馬神宗熙

寧三年五月二十一日制置三司條例司言諸路料買

上供而民間勞費不細河北榷場買契丹羊數萬至牛

羊司則死損及羊屢更法不能止一歲公私之費共四

十餘萬棧養羊常滿三千口為額省其費用之四從之

六月二十三日三司言勾當法酒庫陳世卿等狀每

年宮觀道場設醮合用法酒等管勾使臣申三司下本

庫支供每處差人逐旋津般往彼祇應多作弊倖偷減

移易勾收空瓶動經月餘破却功役乞下逐宮觀開坐
一年中常定齋醮及非汎道場合使酒色額數目申省
下本庫給歷令彼處上歷以瓶赴庫請領依臣僚俸酒
醴例支給如合用瓶亦具數預申省下庫支撥本處附
帳省司看詳畧除非汎道場即令本庫依舊例供送外
一年中常定道場等乞如所請從之 奉慈觀萬壽觀
後苑天章閣延福宮廣聖宮景靈宮崇先觀醴泉觀集
禧觀延祥觀建隆觀東太一宮西太一宮慶寧宮五年
正月九日內廢物料庫入御厨從編修三司敕孫亶請
也 八年三月六日三司言勘會都茶鹽院久為支納
事叢將茶鹽各立逐界典例分管令鹽界支罷京東西

府界蠶鹽并減出賣鹽貨移陝西鹽鈔入市易務下界
管勾但給請軍馬鹽而已別無事務虛占人吏欲乞將
茶界復為茶庫鹽界廢罷其支納煎造並令外物料庫
管勾從之 十年二月以內侍押班右得一管勾翰林
司 元豐二年八月二十三日太常寺言奉詔祠祭以
法酒庫內酒坊酒寔諸樽罍以代五齊三酒今法酒庫
酒曰供御曰祠祭曰常供內酒坊酒曰法糯曰糯曰常
料各三等糯酒常料酒止給諸軍吏史工技人以奉天
地宗廟社稷恐非致恭盡物之義乞止以三法酒及法
糯酒奉祠祭從之 五年六月二十七日詳定官制所
言牛羊司隸光祿寺其養牛乳牛兵匠人入牛羊司從

之六年十月十二日光祿御呂嘉問言光祿掌酒醴
祠祭寔尊壘相承用法酒庫三色法酒以代周禮所謂
五齊三酒恐不足以土稱陛下崇祀之意近於法酒庫
內酒坊以醞酒法式考之禮經五齊三酒今醕酒其齊
冬以二十五日春秋十五日夏十日撥醕甕而浮蟻湧
於面今謂之撥醕豈其所謂泛齊邪既按取撥醕其下
齊汁與滓相將今謂之醕茅豈其所謂齊醴邪既取醕
茅置菑其中其齊葱白色入焉今謂之帶醕酒豈其所
謂盎齊邪冬一月春秋二十日夏十日醕色變而微赤
豈其所謂緹齊邪冬三十五日春秋二十五日夏十五
日外撥開醕面上清下沉豈其所謂沉齊邪今朝廷因

事而醞造者蓋事酒也今踰歲成熟蒸醞者蓋昔酒也
同天節上壽燕所供臘醕酒者皆冬醞夏成蓋清酒也
此皆酒非所謂齊也是知齊者因自然之齊故稱名酒
者成就而人功為多故稱物故享神以齊養人以酒竊
恐典禮如此又司尊彝曰醴齊縮酌盞齊沈酌依經傳
則泛齊醴齊以事酒和之用茅縮酌其盞齊緹齊沈齊
則以清酒和之不用茅縮酌如此則所用五齊不多而
供具亦甚易盞醞酒料次不一此五種者成而皆自然
伏望聖斷以今之所造酒與典禮相參審或不至差謬
乞自今年郊廟供奉上批嘉問論證自有理處今宗廟
所實尊彝酒齊未備就且如其說用之於理無害 哲

宗元祐元年五月十二日詔罷太宮令從禮部請也

六月九日光祿少卿趙令鐸言自來宮闈令當出神主
泰畢升殿其光祿闕視之官亦合先行泰神之禮歆下
禮部凡祠事先祿卿豫升壇殿點視寔設禮料依宮闈
令先行致恭再拜然後升壇陳設從之 二年正月十
五日詔復置太官令一員從光祿卿趙令鐸請也 三
年詔長貳互置 十一月四日三省言在京堂除差遣
素有增改而吏部闕少官多令令牛羊司吏部差俸錢
依在京分數從之 紹聖三年正月二十四日詔翰林
司武臣令三省選差 五月二十三日詔御賜差添監
官并令入內省差使臣管勾常膳等輒開合見御膳者

並加役流其諸局工匠所造御膳滋味不和及諸不如
法三犯決替 徽宗崇寧二年正月七日詔置六尚局
內尚醞局掌供御酒醞之事 詳見殿中省 五月十四日
詔已置尚食局其御厨翰林司併入太官局太官令五
員見勾當御厨官夏綢王遵張太忠並改充勾當太官
局黃滂改充太官令其見今光祿寺太官令亦依此改
入本局惟掌祠事翰林司供御事已併入尚食局餘事
合存留翰林司并見任官依舊 同日詔見今光祿寺
太官令亦依此改入本局惟掌祠事 五年二月四日
詔法酒外庫併歸法酒庫官吏並罷 同日詔勾當翰
林司使臣一員法酒庫小使臣一員勾當太官局兼內

物料庫小使臣二員係勅置去處令本轄官司相度將
職事發併如不闕事可以減罷者罷其增添到員數者
並罷 大觀三年十二月五日詔罷法酒外庫官物併
歸內庫 政和元年三月二十日詔牛羊司監門今後
朝廷選差文武官充 六年二月二十四日監察御史
王桓言祭祀宰禮之具皆掌於光祿而寺官未嘗臨視
失事神之恭乞大祠以光祿卿少卿朔祭及中祠以丞
簿監視宰割禮畢頒胙有故及小祠聽宮闈令或太祝
奉禮攝從之 欽宗靖康元年正月四日詔六尚局並
依祖宗法 衛尉寺舍局同此詔 五月十六日詔御膳早
晚尚進百餘件方令府庫殫竭朕不身先何以率天下

今後可供進六十件十八日詔太官令並替成資闕

八月十九日詔六尚局既罷其格內歲貢品物萬數極多尚為民害非祖宗舊法可並除之衛尉寺尚舍局同

此詔高宗建炎三年五月十九日詔光祿寺併歸禮部以並罷寺監也六月二十六日詔光祿寺舊行祠祭

排辦供應事務並歸太常寺紹興二十三年二月十

七日詔置光祿寺丞一員以臣僚言祠祭禮料並歸市司雜擾不虔故也六月十日詔工部鑄造光祿寺印

一面行使并差胥佐一名貼司二名其光祿寺丞請給人從並依太府寺寺丞人吏見今請給則例支破從光祿寺丞徐璉之請也己上中興會要孝宗隆興元年七

月二十六日詔光祿寺併歸太常寺兼領丞一員罷從
右諫議大夫王太寶等議也 八月三日光祿寺狀見
管吏人三員胥佐一名見行批換副尉候了日離寺貼
司二人合併歸太常寺從之

全唐文

宋會要

翰林司

翰林司在大率門內掌供御酒茗湯果及游幸宴會內外筵設兼掌翰林院執役者之名籍而奏其番宿勾當官四員以諸司使副使及內侍充兵校三百人藥童十一人 淳熙元年九月四日翰林司言見排辦將來車駕幸玉津園文武臣宴射檢照本司省記條冊無上件排辦事節乞依紹興十九年指揮車駕詣諸宮觀等處對御筵宴施行從之 二年正月十二日詔翰林司每遇祀祭供設神食支冰雪一千五百斤從太常少卿顏度請也 四年十二月九日詔翰林司今來車駕幸茅

灘所有排辦事件並依宴射對御筵宴排辦 五年五
月十日詔翰林司自今專知官遇開令本司副知界滿
日各特與留充專知官立界一次九月十日詔翰林司
車駕幸祕書省對御賜酒五盞並依恭謝排辦今後準
此 十三年十二月九日詔翰林司減人兵三十人以
司農少卿吳燠議減祀食下敕令所裁定故有是命
十四年十二月二十四日翰林司狀已降指揮正旦使
人到闕就殿東朵殿設素幄引見辭賜茶所有本司合
排辦事件一御前進茶金稜搗湯醖并宰臣賜茶金稜
搗湯醖已降指揮並改用白成銀稜一御燎子內有朱
紅漆卓杌等并使人入見拆書朱紅漆卓子並乞改用

黃素衣于遮圍一諸色祇應人並合服著紫衫繫黃帶
子詔見辭進茶不用托子餘依 十五年八月二十九
日詔翰林司將見關人兵二十二人持令招拔本司子
弟刺填教額 淳熙十六年二月二日詔翰林司每日
輪差監官一員人吏二人供御人一十人赴重華宮直
應奉 紹熙元年三月二十三日詔承信郎翰林司專
知官徐楨界滿在司應奉有勞發遣歸部日特與占差
遣一次今後準此十二月十四日臣僚言欲乞今後使
人賜宴之際殿上仍舊郎官檢視其三數人從果食差
翰林司使臣一員檢點從之 二年十月二十八日進
呈翰林司何閏等養老葛邲奏曰檢照指揮年及七十

方令養老何閏等年皆未及又給以全分上曰年雖未
及七十却有疾病不任役使亦當聽其養老但請給與
減半今復準此 紹熙五年十一月九日詔翰林司人
兵等每月見請月糧口食米可與於御輦院人兵殘教
內支自今後按月依此施行

全唐文

宋會要

牛羊司在普寧坊掌畜牧羔羊棧飼以給烹宰之用景德中牛羊之孳乳者詔無得宰殺又以每歲冬首番殺為賜傷生頗甚令代以八節羊又河東舊有孳生羊務而市羊於民死者令民償之咸平六年真宗以其煩擾罷之以京朝官諸司使副及三班三人監廣牧二指揮千一百二十六人真宗咸平五年十二月帝謂軍臣曰御厨歲費羊數萬口市於陝西頗為煩擾近年北面擁場貿易頗多尚慮夫於畜牧呂蒙正言洛陽南境有廣成川地曠遠而水草美可為牧地命遣使視之六

年五月詔牛羊司招置軍士但年二十已上無疾少壯
堪牧放者不拘人材即與招收十一月詔廢河東孳生
羊務先是轉運司請於民處配市有死亡者令民償之
頗有勞擾乃選使乘傳取所償數體量停廢 景德元
年三月詔牛羊司廣牧指揮如闕員僚即於本指揮揀
年勞能部轄十將補副都頭即不差殿侍權管節級軍
士月給麻屨合與月糧同厯勘支 二年六月詔牛羊
司外羣送納死羊及諸處取索羊肉羊羝並須每口實
定斤重出抄申破不得止憑估羊節級懸估十月詔外
羣死羊委側近縣尉監造羝送官其頭肚五月至七月
埋窖三月至九月量估價出賣 三年十二月詔牛羊

司畜孳乳者並放牧之無得宰殺 四年六月詔牛羊
司牧羊少失羊決罰之數一口至三口羣頭答四十牧
子加一等四口至六口羣頭杖六十七口至十口羣頭
杖七十巡羊十將答三十十口至十五口羣頭杖八十
已上牧子遞加一等巡羊十將杖六十負僚答三十十
五口至二十口牧子徒一年配外州牢城羣頭杖一百
降充牧子巡羊十將杖八十降一資員僚杖六十二十
口已上牧子徒一年半羣頭徒一年並配遠惡州府十
將杖一百降二資負僚杖八十降一資巡羊使臣奏勘
替與降等差遣 大中祥符三年四月詔牛羊司每年
棧羊三萬三千口委監官揀少嫩者校圖均兼供應四

月至十一月每支百口給棧羊五十口十二月至三月
每支百口給七十口五月詔每秋棧羊入圈每圈給三
司印歷抄上候宰殺時每日輪一圈供殺每年比較棧
羊須二十三斤已上草羊四月至十一月肥月十五斤
已上十二月至三月瘦月十二斤已上即殺 五年九
月詔中年牧羊羣頭牧子所請月糧如金帶外羣者只
支米豆二色月給醬菜錢二百麻履錢一百十一月至
二月借皮裘一至三月一日納官牧羊使臣給軍士五
人當直十二月詔中年縣牧羊造羝九月一日至正月
終令津般赴京自餘送皮剝所賣錢入官 天禧四年
六月詔牛羊司三棧圈自今只差三班使臣不令內侍

省差人勾當 仁宗天聖八年提舉司言牛羊司每月
宣賜臣僚添厨月俸節料草棧羊多不一併請領却令
本司出給寄羊厯逐旋請領仍破官中草豆養餵欲望
自今每月支賜並限十日依色額請領出園出限不請
今本司將元支文字繳送三司毀抹更不支給從之
嘉祐四年六月二十九日詔省牛羊司西北棧園官四
員 神宗熙寧三年五月二十一日制置三司條例司
言諸路科買上供羊民間勞費不細河北推場買契丹
羊數萬至牛羊司則死損及半屢更不從止一歲公私
之費共四十餘萬貫乞募屠戶官預給約以時日供羊
人多樂從得以充足年許仍令牛羊司棧養羊常滿三

千口為額省其實十之四從之

高宗建炎三年四月

十三日詔乳酪院併入牛羊司

四年十一月十三日

詔牛羊司兵級權以七十人為額以本司見管兵級四

十六人見闕二十四人故有是命同日詔牛羊司見闕

軍兵許招收一十人填闕一次其請給依無舊歷人兵

則例及招軍例物止支錢五貫文於本司收到碎肉頭

肚等錢內支給同日牛羊司言本司省記條法頭副指

揮使都頭副都頭節級為資級今來本司上有都頭副

都頭其副指揮使並未曾遷補欲副指揮使依見行條

法遷補施行各與支破本等請給從之 紹興四年二

月七日詔臨安府修蓋滌宮遇祀昊天上帝合用牛犢

入滌養餒 八年七月十八日詔今後牛羊司遇有償
刺羊口數目令本司具的確數目本省部審驗詣實即
行撥充別項使用及遇有講筵并非泛等合用羊口數
內有剩數亦令本司申明省部改撥充數使用禮部言
見今牛羊司宰供御膳羊每日宰羊一口供應每月依
已降指揮收四十口為額內一十口充泛索使用天章
閣祖宗神御每月酌獻羊以一十七口為額緣泛索羊
往往不曾赴牛羊司取索宰供及神御羊亦有剩數緣
不住據牛羊司申乞將上件償刺羊口數目以後充御
膳并神御羊使用令所買州軍權任收買候將欲支供
盡絕即却依已降指揮行下元買州軍收買應副使用

中部申明朝廷等降指揮顯見紊煩故有是命 十二
年八月十七日詔供進皇太后每日常膳并生料每月
實計用羊九十口及節料節序添供每年實計用羊一
十八口令兩浙轉運司收買赴司交納宰供所有闕少
事件等依例下臨安府市令司取索從本司請也 十
三年三月二十六日詔牛羊司權以元減定七十人額
內將見闕人數許行招收一次合得請給並依本司祿
格則例支破內月糧料錢興口食錢米從一多給十二
月九日詔臨安府限一日收買羊一百口猪三十口赴
牛羊司養餽準備使用其供使過猪羊從本司報臨安
府限次日收買補發數足從本司請也 十五年三月

二十九日詔牛羊司許令招收兵級二十人通以九十人為額副知貼司各與添置一名內副知仍將目今頭名手分遞遷其退下手分名關於無違礙諸司官踏逐抽差一次日後遇闕召募貼司揀試充填依條遞遷副知如界滿自到司入仕及十年以上別無贓私罪犯及無官物綰繫許依依解發出職從本司請也 二十九
年八月十九日詔牛羊司有不堪宰殺及有宰殺下不堪供奉羊口令監官躬親驗實牒送臨安府依市價三分減一分出賣收到錢令本府赴左藏庫送納守取朱鈔牒送本司照會 淳熙十四年八月二十七日詔牛羊司減手分一人節給一人曹司一人宰手四人羣頭

二人兵士七人先是牛羊司副知一人手分二人貼司
一人副指揮使一人正都頭一人副都頭一人節級四
人樞子二人曹司二人秤子二人宰手一十五人承局
一人門子一人牛羊承羣頭七人兵士五十三人於是
司農少卿吳燠請減冗食下敕令所裁定而有是命
嘉定十四年正月二十一日禮部言牛羊司中人負張
椿等日常宰供御膳及酌獻神御食料祇應委是事務
繁重乞照御厨翰林儀鸞司等處支給雪寒錢詔依嘉
定三年四月十六日指揮照諸州軍例減半支給

宋會安乳酪院

乳酪院隸左驤驥院掌供御厨乳餅酥酪舊有南北兩院差監官景祐二年合為一以驤驥院監官專副兼充乳酪匠七人真宗大中祥符五年五月詔北乳酪院節級工匠并養銀長行依兩院創支端午紫平綃衫十月免綿袍各一領七年正月詔自今乳酪院應管乳餅酥酪等置計帳上三司點勾所有監收乳汁變造乳餅酥酪每月輪教駿員條一名勾當